

長樂縣志卷十九下

藝文錄下 詩 賦 文

詩

懷直講陳烈

宋少師 文忠公 陳 襄

思君苦節直艱難四十窮經草墊閒文為周衰能方救禮遭秦禍欲
重刪時無正說非楊墨天與多才繼孔顏吾主聘賢方側席好將書

幣起東山

軍中行 景炎初募兵勤王作

邑人 簡法 陳宗傳

胡馬出幽燕風塵起北陬天兵偶不利王氣黯然收六龍狩沙漠誰
復為報仇耿耿孤臣衷長懷麥秀憂回首望京闕血淚相和流安得

長樂縣志

卷十九下

藝文錄

眾猛士盡如穰苴傳戮力共廝殺梟取可汗頭掃清犬羊羣釐復舊
神州奇功勒燕石芳名播千秋

挽從子老成

宋邑人 知縣 陳公榮

邊城將星落浩蕩煙塵黃我亦在行陣生死未可量涕滂感永訣激
裂摧肝腸昔爾仗雄劍志在清八荒神武埒頗牧奇計如平良遇賊
奮英果逐殺何其強氣數乘人事竟向鋒刃僵忠魂薄日月耿耿萬
古光雖云獲死所國恥猶未忘便應作厲鬼虜酋盡殺傷

陳氏三忠

明通政 參議 趙 紱

滿目胡塵宋室殘一門忠義古來難義同元亮心思晉忠似留侯業
為韓獨立勤王虹氣烈雙魂死國陣雲寒卻憐未遂吞胡志千載合



人髮指冠

前題

明戶部主事 魏良佐

仗策馳驅一劍雄持危殉難兩心同但知身世惟君父忍使衣冠向
犬戎勁節共隨星日耀英名長與海山崇於今奕葉翩翩盛景仰忠
貞思轉濃

前題

明吏部侍郎 顧起元

才名卓犖冠鴻都慷慨從軍擁繡弧試問勤王三義士九重曾識姓
名無

又

前人

背城一戰死生閒不解重圍誓不還可惜弟兄同日死千年埋骨鳳

長樂縣志

卷十九下

藝文錄

二

詩

鳳山

贈劉縣簿有源

明翰林典籍 高棟

吳航寂寞山海濱邇來桃李生陽春長官清平佐政理况以簿領尤
寬仁丹徒世澤餘紈綺四十高名聞帝里一騰鶚薦會冲霄五度鸞
飛尚棲枳此邦訟少自無為惟侯之德能撫綏臨民不忍鞭笞苦判
筆無容人吏欺公餘時復開仙館坐對白雲心共遠首石泉聲送酒
涼南山秋色當窗晚落日琴堂聽奏絃清風松下唱酬篇諸公且以
同坐嘯百里何妨枉大賢乃知梅福非徒爾自古奇才應小試大刀
操割無全牛逸氣騫騰見良驥卻笑棲遲老一邱懷恩歸德未能酬
三載願留河內寇百錢擬送山陰劉

前題

明邑高標人

鳳林翰墨帶天香嘉佑儒臣被寵光千載昭陵何事業絲綸猶在德星堂

述績篇 為邑幕黃本作

前人

閩越鎮海國無諸開漢年三山古雄望郡邑紛綴聯樂土少百里編氓居一廛東南半巨浸負廓無閑田止旅日生聚耕桑到瀛壖乘櫂結滇淤廣斥化平原捍禦列大防臨深障巨川狂瀾恣衝突版築隨崩窰樹藝不得施粒食將何緣聖禹力溝洫元功彌八埏伊誰補天漏邦有大夫賢方合實經始趙丞能紹先我侯復繼作事業更光前惟昔下車來辯理民不冤公閒蓮幕靜簷樹挂蒲鞭美政歸令尹賢

長樂縣志

卷十九下

藝文錄

三

詩

勞任妙年輕身犯霜露匹馬趨窮邊地位相陰陽溝渠度流泉風行黎庶集雷布號令傳指揮南鄉民南鄉皆駿奔指揮北鄉民北鄉如雲屯士農別等流什伍相制牽能者十夫長智者百夫權程工較尺度賞罰無頗偏百堵皆作興一夫敢稽延杵聲來登登隄勢走連連坦坦如周行桓桓如繚垣其平有如砥其直有如絃外鬪潮汐雄旣固亦旣堅內分疆理明乃畝仍乃宣告成肅旋駕稚耄爭攀轅佚道以使民雖勞誰見怨辛勤在一時惠愛留後昆萬頃雨水足三農日力全傾家及疆以結耦維十千春種已秩秩夏苗復芊芊秋稼載云登冬租亦少蠲倉箱千萬斯斗米三四錢機杼聲相聞雞犬寂不喧路行無拾遺室處常晏如問此何以由我侯使之然雖然荷帝力抑

且戴侯天侯位從此升侯祿從此遷懋績掩前轍蜚聲塞廣阡西門
與鄭國遺法差可肩召埭與白渠前美不得專我欲移六平鎮之不
測淵將侯一片心寫向蒼崖巔馮夷不敢舞懾伏蛟鼉踰萬古大堤
行因之述績篇

前題

王恭

君不見召公埭白公渠叔敖鄭渾功最殊年豐粒米多贏餘閩洲屬
縣滄海隔築海爲田民力劬炎風赤日秋草枯漫漫不鹵連荒蕪民
饑不足供王租我公到來民復蘇鳩工築隄備不虞濱澗嚴湖水可
漚汗邪甌窶變膏腴禾黍離離接桑榆公田有穀兵有儲春風二月
花滿途村北村南開酒壚黃童白叟但歡娛馴雉不驚鳩哺雛紅蓮
長樂縣志

卷十九下

藝文錄

四

詩

賓幕瑩冰壺玉樹掩映青珊瑚訟庭無事鞭用蒲功歸令尹名不沾
政成秣馬朝天都便當發軔青雲衢願作霖雨沛九區非但小邑蒙
沾濡

書宋陳烈授國子監說書誥後

明邑人翰
林典籍

王恭

吾愛陳夫子名高慶歷中官卑心獨苦跡隱道彌通屢薦金門剡難
羈碧水銅七閩沾化雨百世仰儒風芸閣絲綸在芹宮祀饗同雲孫
憐故物應復繼其蹤

題林泉學圃軒

王恭

吾家書室依林垌日夕清暉多在庭出戶時看花與近捲帷唯見董
山青蒼苔古木連深曲懸蘿石上孤雲宿露葉垂籬菘薤香水藤拂

檻匏瓜熟任是閑門客到疎自甘蕭散學犁鋤新築小池宜抱甕時
開高館復攜書紛紛甲第皆梁肉何事邱園未干祿稚子能收苜蓿
盤家人解壓葡萄綠寂寂林扉絕四鄰角巾野杖亦容身公門若更
栽桃李先數林泉種圃人

華封臥轍

為縣令潘府作

明御史

邑人 陳景隆

萬水俱朝宗眾星咸拱極聖皇宰世履至尊四海郊圻盡來格吳航
百里閩海邊我侯戾止今三年三年述職循常典鳧舄翩翩上九天
僕夫在途馬在馭行色匆匆不堪駐老稚攀轅為苦留後擁前遮聲
載路我侯此去登天曹吾民疴瘥誰抑搔我侯此去居鑿坡吾民疾
痛誰撫摩我侯渾比馬江水淪人肌膚浹人髓我侯仁似首石山遠
長樂縣志

卷十九下

藝文錄

五

詩

人瞻仰近人安願裁短疏徹丹陛暫借我侯還舊治又見花封三月
春萬戶千門總桃李

清風懿績歌

送韓侯紹入覲

明侍郎

邑人 鄭世威

吳航自昔稱樂土平川舊轄移今所無諸南下鎖藩籬北控梅江臥
貔虎瀛洲般若奠襟喉雙洞悠悠幾百秋六平卸落十洋市五馬橫
趨瀟上游首石孤標霄漢中太常卓越籌巖東奧區吻海龍匆結四
時佳氣鬱葱葱佳氣人文相感召四靈乘旺遠騫越俯仰河山今古
情幾度郎官應先後希聲仲舉皆良士次彭蕭伍尤表著王遇昭度
方次雲閩洛淵源政具舉自是民淳俗太古海濱漸被成鄒魯聖明
循吏應期興注厝召猶炳章甫江陰宗亮姑蘇王蒨陋第瑾賢譽張

齊普龍韶尚文化橫琴獨坐退思堂龍峯朱劉書院講罷空屏嶂天啓南

山振遺響潘府建南山書院勸農觀稼二亭稅桑田鄉約訓民崇禮讓肅廟初

年楊麟與何應和雞犬不驚樂事多施澤於民隨久近蔽芾棠陰世不

磨範川為記初泉雨意氣相期互軒翥初雨亭留不愧天排雲百雉

重千祀蔣君四載僅佐佑濱澗水清惠績久一日攀轅轍既南砥砢

倚玉殊妍醜滿堂燕笑翻向隅齊州二斗渺愁余彼美人兮在遠道

安得幘幪百里仍權娛仁看列宿光牛女坐見祥鸞下江滸韓侯至

止民徯蘇倏如旱虐沛甘澍褰帷迅掃陌上塵颺颺輕飄物色新築

味蘭馨梅與侶冰肌玉骨水為神退食頻懷民菜色催科時復問幽

側比閭款款樂瞻依屬掾夔夔共總礪陽春桃李開賢路郵僧蠲征

長樂縣志

卷十九下

藝文錄

六

詩

市平估雀角不喧白晝閑騶從無需民晏堵乘離霽潦汜原田敷淡

虔祈若帝天歛忽翠雲時掩映東臯西崦頌豐年漁陽麥秀古祥異

今茲大有無乃是甯邑穹碑繫去思吾民嚙舞歌平治清風窸窸匪

遐邇懿績駢填昭來許吳航掌故邈無徵屬筆枉余聳嵒嶽憑侯重

訂樹世風逗馥裒芳疇與同白頭擲管擬鏤石旋有太史書吳公而

今送侯千里別羨侯清風與高節懿績在人只一方甯如入朝贊謨

烈入朝早為社稷臣上佐天子下庇民如侯素養喻於義不使不仁

加其身謙尊而光卑不踰浩浩乾坤皆廣居立正位兮行大道萬鍾

千駟直銖錙岱陽山人狷者流對侯語語宗伊周他日相逢天下士

莫說吳航有舊遊

贈鄭與聚

源渙

明本縣令

詹萊

荔英粲若菡松幹鬱森蕭苔蘚臥麋鹿筠篁戲鷓鴣我懷邱壑想君
有鸞鳳標鸞鳳非凡姿邱壑有餘饒出門咫尺地曠若千里遙形影
勞重尋酬唱不成謠積鬱廢朝昏和麗成寂寥吾聞擊壤歌可以致
瓊瑤還因惠風發天路坐聞韶

贈鄭中孚

世威

應召

前人

平生麋鹿性呦呦聲念羣念昔南海濱頗遘肉角磨口啣野草持
用敘殷勤其雨復其雨杲杲怨朝昕吁嗟忽來儀蒲輪薦元纁稅駕
還復起熱中雜憂欣

又

前人

長樂縣志

卷十九下

藝文錄

七

詩

肅肅九苞鳥噦噦鳴朝陽青暈助而劬時哉羨山梁明良庶一德四
海應降康昂昂胎化禽矯翮起高翔遠辭滄溟徼來為廷殿光勉旃
慎躑躅時奏鳴鴉章

贈林慈

王恭

麟經獨抱上王畿官錦新裁博士衣六館夜涼聞漏起五門天曙退
朝歸鳳凰臺上吹簫迥鳩鵲樓前見雁飛西掖環林應不遠相逢休
道故人稀

送高廷禮

棟

應薦之京

明邑人中書舍人

陳登

首石峯前供帳開山城冠蓋送離杯百壺酒盡青驪遠五兩風來綵
鷁催楚國舊傳徐稚隱漢廷今重董生才南宮未久應相見乘此同

吟到鳳臺

謝鄭有度憲

明狀元 舒芬

門閉嵐煙睡正酣夢驚銀鹿達琅函水腥破曉雙還訝海味於今我
獨甘曠世心期憐尚在同年情誼更何堪炎蒸底事酬知己松竹新
培曲徑三

元日出郊

明知縣 吳遵

瑞煙香靄朝菁葱歲首禱帷行縣中山川不改閩粵色絃誦猶存鄒
魯風長江水明日晶晶四野麥秀春融融兒童竹馬不相避對我忻
笑誇年豐

遊長樂新城報寇至鎮下

傅汝舟

長樂縣志

卷十九下

藝文錄

八

詩

島夷山寇巧相依每歲還巢此路歸一葦鎮門宵徑渡雙刀城堞晝
空揮追奔未道兵家忌遇亂方知世事非愁至嗒然惟有睡況當衰
世故人稀

劉巡撫壽追寇至壺井山下凱旋

前人

中丞逐寇遠臨戎馬上能開兩石弓遂使國威揚閩外不教民力困
城中浮人計日仍安土怯卒乘時亦向風罷說亂離前世事四郊烽
火接天紅

送鄭中孚世威還閩

明吏部 尚書 楊博

一宴曲江四十年杏花同醉寺門前曾聞江右觸秦相見說閩中臥
鄭虔先帝賜環宸眷切今皇特簡聖恩偏如何便欲還初服海宇蒼

生共惘然

恭題宣廟所翁畫龍圖

禮部尚書 吳寬

黑雲作雨初收脚似有飛龍露頭角恍然拈筆欲寫之目眩金鱗仍走卻所翁好龍非好真真龍自為龍傳神小臣稽首不敢視龍去鼎湖經幾春

題長樂李侯送行冊

明邑人布政 謝肇淛

獸石嵯峩倚天碧馬江晴漲潮頭立石尤風起舟不前暫留使君行勿急使君治行幾年餘水白山青橐有書蒼生政爾需安石父老何須軼去車

送練生赴闕為其先中丞請卹

前人

長樂縣志

卷十九下

藝文錄

九

詩

六月霜飛叫帝閭百年遺事不堪論孤臣分已無完卵異代恩應到覆盆寶鼎夜沉燐火色玉堦春暗血書痕乾坤雨露恩如海送客無勞弔楚魂

送練中丞遺裔歸家

有引

前人

自金川門之變練公子甯以御史大夫抗節死闕下闔門荼毒獨有侍媵抱匝歲子匿民間得免展轉入閩為人傭保六世孫綺者為新甯陳孝廉所立掌書記萬厯戊戌孝廉計偕入浙有江右楊生應祥同舟先一夕夢練生持刺謁己心異之比入孝廉船見書記侍側雅哲不羣指問何姓答曰姓練生心動叩之曰得非吾里練中丞之後乎綺不應而涕淚滿

面生益疑駭窮詰之具得其狀亟以百金爲贖孝廉不受遺
綺綺不肯行曰以死殉國人臣之恆且九族赤矣歸將何爲
生益賢之歸家具白當事者以幣來聘授以衣巾俾奉公祠
官爲置田廬百畝一時聞者莫不嘆息泣下以爲天道有知
云

燕山日黑黃塵起金川門外鼓聲死長樂宮爲瓦礫場殿庭血流成
海水御史大夫練子甯手持三尺干雷霆覆巢自分無完卵一門百
口歸冥冥事去人亡三百載蘆荻蕭蕭餘故壘長陵松柏已十圍孤
臣遺骨今安在釣龍臺下今可楫新甯城東山截業灌園誰能識法
章傭肆猶堪藏李燮一日天迴地轉時千金購出練家兒若敖之鬼
長樂縣志

卷十九下

藝文錄

十

詩

終不餒行路聞之皆歔歔我登鍾甯山遙望石頭城甯爲孝孺死不
作陳瑛生爲君慷慨終一曲悲風颯颯江波綠

送林永光出守臨安

二首

明禮部
尚書

李維禎

高山仰止十年餘忽漫相逢歲欲除詩社主盟惟白下辭場獨坐接
黃初清霜寒拂龍文劍甘雨春隨熊首車明到政成聞問好始知名
士定無虛

何年莊躋遠南征留得牂牁表郡名食品常珍行蒟醬蠻歌新調閒
簾筍訟庭入賤文無害燕寢凝香政自清坐鎮諸蠻來謁款山農相
狎力刀耕

前題

葉向高

聞君出守向昆明
藜藿道應看叱馭行
萬里風煙迷故國
三春花鳥引前旌
地無迎送官
偏好郡有湖山夢
亦清林壑只今寥
落甚何時重結白鷗盟

送陳蓮湖太守遷秩

明狀元 文震孟

使君丰采信翩翩
彩筆縱橫大歷年
水國秋雲生鷁首
星橋明月落帆前
謳吟聲並蘇臺迥
惠愛恩流震澤連
民力東南凋敝盡
阜囊須早達堯天

前題

明 王穉登

瓜期欲代不能攀
使者清風載石還
公事無多付流水
吏情終日對寒山
稅輕商賈如歸市
法簡帆檣競度關
一片豐碑如峴首
他年過

長樂縣志

卷十九下

藝文錄

十一

詩

客淚潺湲

送閩進士林瓊田教授吉安

明吏部尚書 楊博

經明真羨汝
畫省接高論
黃甲名同第
青氈道自尊
前修安定在先
正考亭存想到
吉州日天寒
雪滿門

送鄭中孚

世威 入蜀

明狀元 羅洪先

榜下逢君兩鬢青
廿年去住跡迷冥
衰顏縱見應難識
猶是書生誦六經

又

前人

無計相留抱膝吟
聞窺潭水見君心
西行不畏瞿塘險
只有當年鶴與琴

白雲亭

宋 林通

白雲亭構占浮圖賢尹標名意有餘
開抱石巖禪客座影籠墨跡憲
臺書玳瑁玉溜無停響瀟洒琅玕
不用疎登賞已知情放佚飄飄應
喜類相如

又

前人

雙溪會處創危亭我愛亭成不異名
到此更誰分別派同歸終見入
東瀛清輝黛染環簷色幽響琴傳
出澗聲自信竹林林上美剪裁今
已屬賢明

前題

和前韻二首

宋 袁正規

幽奇山水卒難圖亭插白雲景象餘
共樂靈蹤還舊址好編名字入

長樂縣志

卷十九下

藝文錄

主

詩

新書面前滄海迷三島林下誰人繼
二疏洞裏蒼龍頭角老埋藏歲月
意何如

碧桃溪會創幽亭豈是從前浪得名
靜對好山閒日月却疑塵世有蓬瀛
簷閒自在煙雲合砌下長流風雨聲
林塢不遮滄海濶暫來還得眼雙明

前題

宋 進 徐壽朋

飛泉山脚水盈盈溪會庭前就榜名
駐日合流尋異派爽心臨眺勝登瀛
遊人暗認仙原景清耳微傳玉佩聲
依約白蓮當日事社中賢令有淵明

臨江館

宋 縣 袁正規

巍然水曲見樓臺人指安昌邑壯哉般若山頭當戶外吳航渡口瞰
江回湖平文鶴浮空遠月滿星槎泛海來投轄不因勤粵主爲憐煙
靄共徘徊

望海亭

宋縣令 袁正規

沈澹亭前景最豪委輸江漢任滔滔蕩雲處處千層浪沃日重重萬
里濤析木有津連地下蓬萊堆玉插天高飄然直欲乘槎去世累須
憑割愛刀

前題

宋進士 陳壽

謾指庭前栢西來意自深迷人終著景達士了忘心六葉傳真諦微
言振道林法門應不二來此默追尋

長樂縣志

卷十九下

藝文錄

三

詩

靈峯寺

宋縣令 董淵

礪硤迷沙界豁訝占洞天門隣金布地橋枕玉鳴泉庭鶴歸遺主龕
龍去失年掃雲嫌俗駕題壁詫詩仙勝境無今古居人有後先不知
遊者馭誰見海爲田

勝會堂

宋進士 徐壽朋

巧運風斤若化成過門車馬每留行吞含氣象歸平隴鬪湊溪山到
畫楹春借杏桃紅照耀曉披煙靄碧低橫使塵映日安牙隊依約當
年細柳營

白雲堂

管師復

入寺層層百級梯新堂更與白雲齊平觀碧落星辰近俯見紅塵世

界低

九日亭

宋縣令袁正規

崢嶸棟宇壓巍峩九日遊人自在過鳳翅岡高圍海國龍鱗松古蘸
煙蘿齊山景色知難比彭澤風光幾倍多每上醉來開口笑幽香無
奈菊花何

又

前人

不愧嘉名取次題寓情髣髴古人齊菊添細蕊金英重松覆清幽蓋
影低上戴星辰全咫尺傍纏日月自東西宜將斗酒頻相屬靖節從
來到此迷

前題

宋進士張子厚

長樂縣志

卷十九下

藝文錄

西

詩

九日亭成氣象高宰君乘興幾回過山憐峻極凌霄漢路愛幽深入
薜蘿長恐泛杯籬菊少不愁落帽海風多香醪正熟芳時節對此年
年奈醉何

前題

宋進士林通

危頂裁成九日亭蓬瀛透出海峯青滿前細菊浮樽酒四顧凝雲簇
畫屏月為情多良夜至人貪景勝醉魂醒風流合尹江山主此樂同
民德已馨

海雲窟

元石道遠

鑿破雲堆置石床空濛一竅海天長袈裟坐溼朝朝雨幾閱人間甲
第荒

紫陽樓

明縣令 王遵道

闌闌叢中聳道家紫陽樓閣藹煙霞來遊自是多風景臨眺休思感
物華谷口晴雲微帶雨澗邊春水盡流花伊予得遂留題興揭素揮
毫墨染鴉

見山堂

明參政 邑人 陳毓賢

堂開山見留名古今日開堂又見山漁隱石田留故跡見山見字喜
開顏

阜南樓

明知府 邑人 李叔玉

層樓棟宇儼翬飛南望羣峯聳翠微風月雙清詩境豁江山一覽盡
屏圍綵衣共祝萱花壽華扁仍題棗萼輝此日登臨無限趣高吟長

長樂縣志

卷十九下

藝文錄

五

詩

憶謝元暉

竹所居

任彥傑

君愛淇園策幽居數百竿清秋風玉振涼夜露珠團翠色歸書潤濃
陰入座寒七賢題品處高興寄雲端

梅軒

明知縣 潘府

四十無聞向五旬依然天地一間身林閒黃鳥誰知已江上青山鮮
識人古梅照月寒香淡宮柳籠煙暗綠新寰海英雄多落魄狂生未
許浪悲春

又

前人

浪遊江漢八千里處處春風詩滿船日暮青山迎遠道雨餘新水漲

平川終古是非三史外半生懷抱一燈前知心喜有梅軒月午夜清光閩海天

首石山詩

明知王 煥

巍巍高哉首石山突然秀出羣峯表六平以下皆俯迎雙江西來自環遶穹宇空青近可摩滄溟渾噩遙惟渺雲際難爲華嶽高眼前只覺邱陵小通知鍾秀非偶然鳴時端爲魁元兆我來登覽問山靈此去瀛洲路多少須臾心曠神亦怡拂拭蒼崖坐芳草掀髯喟爾發清嘯萬斛塵懷盡傾倒便欲乘風跨紫鸞飄飄直上蓬萊島擬探月窟躡天根笑看乾坤幾時老

芝山詩

明 李 騏

長樂縣志

卷十九下

藝文錄

六

詩

東山六曲屏峯下祇樹深沉舊蘭若施食臺前芝草香繡經席上甘泉瀉我昔逃禪於此山上人飛錫上方還香床說法天花落丈室懸燈水月閒揭來精舍東溪裏垂帷永日聞流水四壁烟蘿雨外青六時鐘梵雲中起盃簪乘暇更登臨共愛雲堂花木深莫道空門俱是幻片時清淨卽禪心

小有天詩

高 棟

閩關西來入紫冥三山東走浮大瀛迴峯際海結飛翠玉削青天開六平六平崢嶸何壯哉六平芙蓉如掌開九華五老讓光彩三峯二室爭崔嵬我疑十洲仙島負奇勝巨鼇別駕移蓬萊紫微文筆左右立龜麟太常前後揖馬江一道瀉空回鶴嶺千重決雲入榮光佳氣

鬱鬱闌鱗次參差萬家邑何年作邑此山阿此地繁華竟若何窈窕
千門桃與李春風百里滿絃歌吳航渡口花如霧首石雲飛帶宮樹
漏鼓長隨般若鐘仙舟盡入瀛洲路人物風流幾廢興江山陳蹟古
今情茫茫天地四方字浩浩乾坤一草亭君不見六平山上月昔照
六平山下人六平山色長不改明月照人今幾春我向今人間千古
今日吳航古鄒魯黃童聚舞皓叟歌共道賢人宰吾土郎官政靜心
自閒愛人愛物并愛山興來攜我二三子登高遠望窮躋攀我生放
浪在林藪幸際明時將白首縣官有德不忍欺帝力無爲我何有日
陪鞍馬縱遐觀弔古興懷但呼酒酒酣再拜獻長謠先祝堯天萬歲
壽然後紀公事業在巉巖名與六平之山長不朽

長樂縣志

卷十九下

藝文錄

七

詩

小有天歌

明王恭

海上羣峯屹相向六平秀出羣峯上絕巘飛泉掛薜蘿遙天落日開
平嶂華頂雲歸見大荒鴻濛元氣帶滄桑清輝迢遞近觀德空翠依
微接太常百里人家花外靜數椽僧舍竹邊涼石林蘿徑行人少藥
院茅亭絕紛擾遠澗秋聲鶴夢寒遙巖夜月猿聲小巖宮才子日登
臨踏閣攀林契賞清興來揮灑蘭亭筆柿葉淋漓醉墨深谷口驪駒
動行色送君遠赴金門客功成早賦歸去來重拂橫琴苔上石

龍角峯詩

明王恭

六龍頭角屹中天鼇極翻疑出海邊領下探珠無俗客毫端題句有
名賢春來雨灑溪流急秋去雲開石洞連爲愛臨川遺筆在剡苔細

辨不知年

靈峯寺

明邑人 參政 陳毓賢

山色春濃草色低野情詩句向僧題雖然未解三生會且對晴雲日未西

又

前人

巖下疎鐘向晚催逍遙雲寺飲殘盃南遊古洞春光滿東望高亭海水迴冠履喜逢三老會袈裟新着一僧陪天風似約清前路快我登臨此一來

靈峯寺歌

在十 九都

蔣之奇

我來靈峯望滄海夜半起坐望海亭沉沉水面正陰黑六龍銜日猶

長樂縣志

卷十九下

藝文錄

六

詩

未平須臾曷谷光氣發五色變怪不可名洪濤洶湧九鼎沸蛟蜃伏
匿魚龍驚金鴉騰翥若木末煙消霧散天下明狂風喧兀簸巨浪猶
似百面雷鼓鳴崩騰蕩洑傾五岳麟鬣磨碎鯨與鵬嵒峨忽駭陵谷
變雪山千仞天際橫飄飄番舶隨上下出沒僅若水上萍忽然風霧
萬籟息金斗熨貼一練平碧波湛湛千萬頃參錯島嶼如杯罌三江
五湖亦甚大視此乃類蹄中泓琉球佛齊日本國隱隱微見烟林青
三山歷歷亦可數突兀下有鼇頭撐惜哉秦王不到此勞心徒欲求
長生我雖流落江海上獨此寄寓亦可矜行當結茅練金液以待九
轉靈丹成仙飛羽化會有日直跨三島梯青暝他年故人或相問請
來訪我於蓬瀛

籌峯歌

明王恭

海上羣峯一峯別羣山向下如邱垤雲開華頂見琉球天盡滄波帶
吳越元氣鴻濛溼不飛涼霜五月襲人衣迥臨飛鳥空青外始識籌
峯天下稀石林陰洞何冥密萬籟秋聲散秋色南澗飛泉鶴夢清太
陰積雨龍漉白我聞伸蒙子雲臥清暉裏一旦金馬門名高此山水
憶昨伸蒙罵賊時悠悠往事亦堪悲支離一代忠臣義感激千秋達
士知郎官作縣先名節獨訪遺蹤弔前烈載酒惟澆石上苔回鞭不
醉山中月東山歌酒蘭亭筆疎散當年竟何益願君遺愛比桐鄉功
名紀在籌巖石

晦翁巖歌

鄭世威

長樂縣志

卷十九下

藝文錄

九

詩

吾聞昆侖統元氣磅礴滄腴時閒值人參其閒爲三才浩然之氣一
而已君不見武夷之山高插天九曲下注劔潭萬仞淵扶輿綺靡多
奇怪潭有飛龍山有僊劔潭一瀉倏千里滙入馬江波濤湧天起武
夷矗矗無數峯奔迸東來作南紀卓哉千載紫陽翁避地吳航振奇
蹤四子依歸杏林雨三春歌詠舞雩風指南夷猶倡絕學海邦翁爾
宗濂洛參天一氣薄星辰應地無疆奠河岳龍峯高兮天尺五讀書
處兮墨蹟卓今古當年大道照容光遮莫輕陰翳層宇雖然消息盈
虛任去留浩然之氣直與造物游駕言從之道伊邇請君濯足登高

邱

晦翁巖詩

鄭憲

仙旌九日訪層巔巖上黃花散晚妍雲倦松風迴石洞霞明島日麗
江天秋來宋玉偏能賦老去揚雄獨草元幽賞久乖纓弁後碧山回
首憶他年

晦翁巖讀書處歌

高棟

巖下春色深客心自茲曠玩奇不知遙青山鬱相向溪聲送行衣空
翠引閒杖洞門倚天開苔徑緣雲上松際真境豁石林爭異狀稍知
僊趣深孰謂此身妄東厓極眺聽晚色分遙望雙鏡落澄湖孤帆入
溟漲蕭然微雨來爽氣橫疊嶂笑揮紫霞杯醉和白雲唱茲賞吾道
存良遊保閑放願割區中緣煙霞許相傍

雲洞

在十
三都

邑人

蔣奕芳

長樂縣志

卷十九下

藝文錄

三

詩

白雲古道繞高峯翠色山前已數重杖屨獨行隨去住袈裟相見且
從容巖飛曉瀑千層雪樹吼秋風萬壑鐘欲訪將軍棲隱蹟留題多
被紫苔封

其二

香巖窈窕俯千峯虛洞時聞下界鐘風磴晝晴藏虎豹雷湫春雨挾
蛟龍崖雲覆草青遙斷村樹環江翠幾重對此杳然忘世慮擬隨飛
錫未能從

歸雲洞

在十
九都

邑人

梁澄漪

天作靈峯十二奇此中風景最相宜龍歸猶帶雲來溼獅伏頻瞻月
上遲禁約難疏陶令酒推敲誰辨賈僧詩班荆久坐情何逸風落巖

花了不知

梅江謠

高棟

六月登玉京炎蒸欺人不可行側聞梅江水寒冰玉壺只如此梅江
之水千丈深人言此水值千金未必稱人意我獨愛之清塵襟皆山
樵人造我語相攜尋幽指何許塵心飛度象潮雲水濶天長未言苦
青眼故人如白鷗招邀待我黃沙頭探秀探奇入靈境上攀龍峯最
高頂龍峯絕頂窺蓬瀛登高望遠形神清大江茫茫瀉溟漲元氣浩
浩無虛盈飛濤一髮雪花白遙山數點琉球青欹帆側舵凌空濶歷
亂中流棹歌發居人雲水弄生涯撒網拋綸到窮髮君不見龍峯山
陽五百家龍峯市上半魚蝦儒生不學老農稼青門多種故侯瓜三

長樂縣志

卷十九下

藝文錄

三

詩

尺兒童誦詩禮向余亦指長風沙一嚴兵備限荒服百雉孤城鎮海
涯孤城獨戍揚威武島夷蠻胡竄如鼠清秋幕府偃旌旗白日轅門
臥貔虎如此承平百事無江山秋水待吾徒諸賢傾倒平生意瓊杯
綺席來相娛我愛江山對君酌江山笑我醉猿鶴從來心事戀烟霞
漸老誰知愧林壑今日向君傾紉尊千觴不斷別離魂臨歧揮手謝
知己飛心騁目瞻天門興爲梅江謠醉別梅江去他年此地濯塵纓
憶得西城別君處

答梅江謠

王恭

梅江水流浩浩居人盡說梅江好自從梅江築城池使車絡繹無昏
早梅江水深復深行人一見懷千金老父平生愛江水日飲一石無

貪心青蘿盤盤數峯色憑登望見扶桑白蜃氣朝凝鮫女宮珠光夜
照天吳宅居人生少依江皋架屋榭巖結構牢沙鷗不肯逢機事江
叟何嘗識縣曹我我百雉連山郭島夷清甯無剽掠將門子弟解逢
迎大姓兒郎談禮樂有時江上漁歌發振舵抽篷向空濶蹕蹕竹篔
紫鱗肥撥刺金盤素鱗活龍門子何處來向予西指鳳凰臺京行此
別三千里暢飲應須數百杯謝公好爲蒼生起山中猿鶴徒爲爾到
日江淮有鯉魚尺書先寄梅江水

荔枝歌

鄭世威

勝畫名果何處來六都殊品閩中希總是地靈大英特儲精生色偏
絕奇豈知今日饋送廣翻使肥甘作苦悲春汎此離勞草草旱疫爲

長樂縣志

卷十九下

藝文錄

三

詩

災百枯槁寃哉崇物獨榮華轉輸官府承奉好晨炊無米吏拍門東
催西討送司道勸勸戎馬漏孔多涓流不塞成江河鬻兒供應已云
極設復濫觴無已將若何司道臺高隔千里那得懸知民痛痾民痛
痾多餓殍側望循良少舒嘯常德之龍琰東莞何應和郵寄賑饑恆
悄悄鎖守需採屢空回閩落晏如無勾擾嗚呼安得賢牧長若渠坐
令凋劫皆懽娛白叟只今稱卓魯何如一騎笑須臾君不見滇中石
廣南珠何時滅天壤俱作俑者誰千古萬古長嘆吁

西石巖九老圖

在二十
一都

林 恕

西石巖千仞幽含萬象并泉從銀漢落石傍紫霞生諸老神仙侶前
身洛社英乾坤留勝覽湖海豁閑情白髮尋行樂紅塵謝俗榮煙霞

三島迥風月九霄清吟弄詩盈帙流連酒滿觥東山攜短屐南極萃
長精松下琴三疊花閒鳥數聲春愁消碧澗秋興動滄溟洗耳冰壺
冷澄心石鏡明庭虛無客到洞暖有芝榮玩易臨流坐看山倚杖行
意隨魚鳥靜身共水雲輕採藥猿相引濯纓鷗不驚放懷天地窄鼓
腹秦階平世慮忘耕鑿生涯儘醉醒謾尋茅岫訣已作葛天氓小子
慚迂拙高風仰老成鹿門懷舊隱蝸角愧浮名身世邯鄲枕韶華逆
旅程願辭霄漢路歸受圯橋盟

賦適安堂題于方壺所寄書詩

在二都

陳亮

小隱翻成大隱媒終南捷徑共蓬萊君家草堂獨瀟灑半占峯南松
際開草堂松際秋聲裏四壁清暉映鳥几卷幔朝眠日出高野鶴孤

長樂縣志

卷十九下

藝文錄

三

詩

雲祇如此孤雲野鶴澹忘形贏得邱園養性靈飛騰未應郎官宿嘉
遜猶當處士星吟詩作畫多閒放心跡悠悠古人上玩宇天空豁遠
懷嘯臺夜雪聞清響王門記室舊交情國子先生若弟兄清時共遂
鵝鸞去白頭誰同鷗鷺盟顧余別是滄洲客蓬藁相逢卽相得對酒
龍門月色秋放歌雞與潮頭白壺邱仙墨思紛紛千里神交寄樹雲
坐臥草堂時見畫知君不羨北山文

仙人峯

明邑人按察使林恕

鷺峯攢翠鎖煙蘿絳節曾聞向此過雲嶠尚留巖畔跡洞簫猶憶月
中歌松翻翠蓋蟠虬壑水滿銀塘隱鷺高我欲騎鯨東海去一竿長
釣白鷗波

遊朝元觀

陳省

仙人絳節昔朝天觀號朝元駐列仙讀史諸公分太乙科名先後故

蟬聯

秀峯

陳省

昨夜探奇到上方焚香朝拜禮空王地多山氣常飛霧天為春寒每
降霜樹裏流泉侵曲徑峯頭秀色護禪房人間何處無檀越大殿休
教草色荒

董峯

前人

董奉有奇術煉藥棲此巔至今顯靈異彷彿來神仙神仙我觀之散
髮顏少年迎我執我手與我茅君詮伊余有獨訣無欲寤自然

長樂縣志

卷十九下

藝文錄

三

詩

石人峯

陳省

穀城事已遐望夫石何有愛此危峯奇獨立在高埠日照影不移溪
流任飛走傍有白雲汀閒鷗時相友春秋幾代謝山中不渝守所以
泉石人千秋期不朽欲來巢雲松石耶永為偶

晦翁巖

陳國樞

宋室名賢此考槃晴明約客共彈冠交松疊翠迷行徑卓石當空擁
坐壇海角自來天氣肅春深猶帶晚風寒永和勝事頻虛度得至能
無竟日看

晦翁巖讀書處

明邑人光
祿寺丞

鄭憲

曲徑縈危石重巖隱小亭谷虛風浩浩江迥日冥冥古樹凋寒暮晴

峯麗晚屏昔賢迴逸駕千載仰儀型

破石潭

陳省

汲女蛟吞入水深雷轟尸出見天心相傳閱歷年如許靈氣猶存會作霖

搏紗潭

前人

管窺蠡測海天難底事投紗欲測潭遂使潛龍驚欲起至今烟霧出瀾漫

蘇老澗

前人

時光迅望舒靈曜疾羲御所以耽遊人夜行秉燭炬邈哉蘇才翁公餘覓佳處風塵不足娛來作烟霞侶澗谷有幽光刻畫見才諳水決

長樂縣志

卷十九下

藝文錄

三五

詩

寺已頽潭空龍亦死獨茲蘇老名千秋傳不已

龜宿山

宋縣令 閔希聲

在昔菴居小客過於今宏構敞烟蘿夜堂月滿塵心滌朝饌蘭薰法味和巖鳥好聲時格磔庭花芳意任婆娑山川信美非吾土添得鄉懷一倍多

桃源洞

明邑人 太僕卿 陳文沛

路入桃源小有天桃花流水遶平川沙堤曩日曾行相巖築當年起夢賢一徑夕陽飛鳥盡三台石闥古藤牽捫蘿欲竟烟霞際滄海明蟾到客邊

又

前人

一勺泉源下九天平分芳潤滿晴川青雲喚過擔秋客丹嶂應高起
鳳賢浴日才華經濟外濯纓心事薜蘿牽共移坐處紅塵淨明月清
風對酒邊

三台石

前人

巍峯疊嶂迫穹冥風氣滃葱久孕靈千載生賢誇駿嶽三台列石動
文星沙堤鎮月雙流合瓢窟收雲數竹青甲第英才符泰運雍容風
雅步周庭

石舫

前人

八月星槎海際空崇岡何處下艤舫秋風不作張騫興陸地難為臬
老雄欲鍊雲根登墨客先梳石髮覓仙蹤相逢攜手登臨處萬里乾

長樂縣志

卷十九下

藝文錄

三

詩

坤一嘯中

豸石

陳省

一自雷轟豸角殘居然峯迥貴人冠須知天意期英哲莫負簪纓世
代看

三溪

明邑人 陳文沛

巖扉白晝掩杖屨到來稀精舍臨三峽花叢坐六時話賓壺裏月撥
闌局中棋九德勞相憶松雲繫夢思

五峯山

廣文 陳國樞

五峯之秀董峯來一曲逶迤寶殿開牛臥山頭猶未覺龍歸天上竟
無回東流不盡前朝恨西望空懸百丈窳佛母留題疑信半看看漸

已掃莓苔

朝陽石

前人

名德何年遜此閒高僧為主破愁顏道心寂靜朝而暮世路崎嶇去復還望海眼寬窮隱島朝陽手勒寄茲山經今無數登臨者共坐班荆笑佞姦

紗帽山

陳省

吾家古槐上巒巘紛如綺開門見悠然茲峯獨雄峙紗帽何所云山形迥相似吾已謝簪纓留以待來禩

鼎山

戶科林正亨
給事

社山東嶂海門開遙映湖頭一鼎台物象九州窮魍魎天成五位卜

長樂縣志

卷十九下

藝文錄

三

詩

鹽梅不妨蓬島虛丹竈為笑汾陽祀泰臺傳器永存御國鎮更餘王氣鑄卿材

靈峯龍龕

明高繼文

名峯佳境出塵寰大老尋真愛此山景物勝如三島外乾坤長在一壺閒瑤池滿座仙頻會寶刹禪空雲自還醉後陶然忘世慮高風能有幾人攀

靈峯歸雲洞

宋縣丞曹元振

石洞陰陰瑤草垂靈師移錫致雲飛雲心莫道全無著應解從師去復歸

龍東旭日

梅花八景

王自聞

龍臺吹角五更寒喚醒千家夜色闌
翳爾燭龍升海上東方杲杲透
長安

雞與晡霞

滄浪渺渺海門寬獨障中流旣倒瀾
最好彤霞迎返照時逢仙子擷
來餐

斗壺遠舶

臺隍迢遞枕華夷一望天高海日卑
雖道獻琛成歲事莫教樓櫓懈
舟師

碁隴羣樵

一枰碁局着山隈漫說爛柯古事稀
惹得朝朝樵子採擔頭挑盡白

長樂縣志

卷十九下

藝文錄

三

詩

雲歸

浪臺月影

鯨海無塵四野開狼烽久冷百年灰
夜深月浸寒潭裏倒影共猜作

鏡臺

石鼓潮聲

生成石鼓臥山阿萬頃長江別有沱
夜半秋濤衝作響詩人錯起賦

鏡歌

馬疇飛雪

白石透迤拱翠微瓜田花發更芳菲
馬蹄一踏西風猛滿地吹沙作
雪飛

虎穴號風

紫崎片片插芙蓉面對晴山爽氣濃五虎浮江留穴在時疑風起會雲龍

賀雨

前邑 張學舉

邑西北首石山於封內為最高雲興輒雨戊辰春夏繼旱禱雨於山下郭公祠甘霖大沛前三日禱三溪之天龍井焚牒已山後即作雨勢歸輿盡濡為長民幸神貺之厚仿白香山作賀雨詩以紀其事

首石嵐重雨意生首石雲罨雨脚平八月不雨愁下民神功抑此驕陽橫天龍之井龍氣并金蛇迅掣雷車轟倒捲南溟虛空盈高隴下

長樂縣志

卷十九下

藝文錄

三

詩

田飛流爭早禾盡蘇番薯萌占年不誤良農耕汾陽遺蹟東城闔蕩掃海氛來南征千秋廟食祀事明誰歟議裁殊硜硜繫予祈禱奠兩楹立竿見影通精誠山川有神斯效靈致祭封內心怵怵民食為天垂先型黃收轉瞬萬寶成夫差戰艦問水濱牙樯錦纜千花縈金闈麋鹿遊榛荆吳航空復傳佳名數告有年不避兵長樂之樂無與倫巍科高掇邦人榮首石能作隆隆聲何若時暘時雨災沴泯歲稔人和訟庭清吾以長謠代其鳴

縣試示勉諸生

簿塵暫拂試羣英颯颯傳來角藝聲殘暑頓祛連日雨新秋初放一天晴搏鵬莫道雲程遠識駿難誇老眼明丹桂幾枝杏十里行看首

石應時鳴

壺京潮激接蓬萊並助言泉倒筆來作賦久閒橫槩手校文待獲揆
天才濤春夜枕茶頻熟燭盡風廊漏屢催攻苦廿年成俗吏一逢鎖
院一徘徊

聞會南來文獻邦下車早已訪冠裳振靡亟返民風古式俗先從士
氣強天爵修為爭假借人綱肩荷豈尋常儒先真際聲華選岐路中
閒自忖量

文章竅妙孰為先養氣工夫透性天史括經囊非漫爾句奇字險總
徒然赴機猛擬千鈞弩構局精如萬選錢不獨榮名預科級名山大
業有人傳

長樂縣志

卷十九下

藝文錄

三

詩

閩學源流詩

十首
其九

七十子而後理學晦而不明濂洛關閩獨得其宗乃龜山崛
起負道南之目朱子集厥大成彬彬乎閩學稱尤盛也余官
於閩歲且久歷考遺蹟或拜其祠宇下竊幸近其居溯源尋
流擬古詩若干首以識景仰之忱云

直卿有益人思堅而志苦館甥誼特肫斯道心早許理學有源流匯
委功良鉅病革授遺書珍重叮嗚語傳薪謹師承糟粕在訓詁厯官
著循聲無過取懷與易名固積口勉齋自千古

彭節婦

為陳佶
甫妻作

縣令

賀世駿

縮結同心忽斷時一腔碧血有誰知秋風颯颯凌衰草夜月溶溶照

素絲馬鬣新營先子兆熊丸兼作藐孤師於今蘭桂騰芳遠捧得
綸音報母慈

秦節婦 為陳一文妻作

沈荃 華亭人

三山多淑氣南雅接芳型百折存孤緒重泉慰一經汎舟心共矢畫
荻事堪銘此日溪湄畔涓涓不忍聽

前題

汪琬 長洲人

絡秀持門戶能齊孟母芳柏舟成苦節萱草挺嚴霜南雅先人宅皆
山處士莊百年慈訓在遺澤迴難忘

前題

尤侗 長洲人

絡秀家原貴陶嬰節倍難傷心題燕縷忍死和熊丸棹楔門旌盛松

長樂縣志

卷十九下

藝文錄

三

詩

楸戰角寒孤兒千里外流涕望郎官

前題

宋琬

燈前清淚忽潛潛滴向三山烈女篇江汜甫歸何日悔室家未有善

為憐百城堅守先人澤象卵圖存傍墓田閨閣忠貞原不易中興南

雅是凌烟

前題

張玉裁

有客從南來授我書一帙長跪發錦函芳香滿幽室皎皎秦孺人矢

心慄冰蘖當年事箕帚貞靜辭專席夫子感沉疴悲摧將永訣嚙指

誓相從泉臺看咫尺傷彼藐諸孤誰為撫成立九死良非難承祧計

安適綦縞處總緯殘燈照永夕舊物憐青氈遺編存手澤鳴杼閒

晤丹熊與畫荻辛勤三十年霜操堅金石只今蘭笥中藏血淋漓碧
願起懷清臺貞珉鏤奇蹟

前題

橋李
曹溶

棄藏手澤復何如斷指存田計不疎月冷蘭房纊可辟霜飛蕙帳荻
堪書只知一德凌冰雪猶使雙孤集合譽寶婺至今光徹夜好留正
氣貫蟾蜍

輓林貞女

為蔚夏仲
女淑姒作

鄭愈

多病鸞分鏡千秋女史香懷貞根至性遺語斷柔腸截鼻真何事完
名亦有方自憐身葦葉白骨總歸黃

前題

潘文望
邑人

長樂縣志

卷十九下

藝文錄

三

詩

夫死天崩并地坼奮袂揚眉詡壯烈猛然徑造夫壻門投繯蹈刃多
激切亦有抗節守夫家髣髴我特志靡他操持艱苦經百折空閨聞
寂却紛華何如林氏女名淑孔雀屏開誰中目勉齋賢裔青山黃早
把紅絲雙繫足黃郎弱冠壯文章健翮凌雲志激昂才尤每被造物
忌未諧伉儷遊帝鄉林女聞訃肝膽裂玉瓶易墜簪易折矢死丹心
早自盟未忍揚言頻忍泣強留食息向人閒夜雨秋風血淚寒獨旦
望夫已化石吞聲洒竹欲成斑失天此恨何終極花不成春月掩色
慙恩米水漫沾牙終向泉臺成比翼從夫本是尋常事何必轟烈震
天地視死如歸性所甘不須激烈蹈白刃只拚一命報夫君病息奄
奄祇自焚捐生政不戕遺體已從地下佐修文要知貞女一年心柔

腸暗斷淚暗傾填海枉頻精衛力招魂空託杜鵑聲殉烈守節較難
易祇是閒常爭血氣似茲一意徹初終不立異處真大異生前許字
死得歸玉無微玷璧無虧名流不着粗豪氣長爲巾幗樹芳徽

前題

陳九鼎 邑人

從夫矢志羨從容引決無難瞬息中百計慰留非女志千秋節義紹
宗風青山如見顰眉黛銀漢應添泣淚紅不泯丹誠誰識得化爲雲
氣薄蒼穹

前題

陳逢泰 邑人

桃夭方待賦忽慟所天徂夫面祇形夢妾心若合符計聞腸欲斷淚
滴眼幾枯縞素歸同穴精英兩不孤

長樂縣志

卷十九下

藝文錄

三

詩

贈李邑侯

葉起沈 邑人

文章事業亶相符暫試江城困已蘇無數生全三疏抗許多丁口一
誠輸宦情不讓秋雲薄歸興猶嫌鶴影孤養重旁求知有日竝看名
姓上麟圖

聞姚督臺疏請遷民復回誌喜

高于崗 邑人

兵氣全銷古八閩鄭圖徐繪入 楓宸九重封事曾三抗南海菑畚
得再新天下先憂原有淚蒼生待命豈無因裴公郭相昭前代千載
而今識老臣

報許遷民復業頌姚督臺章

前人

聖世疇咨在海濱衮衣久肅此元臣帷閑方叔三千幟掌運雲臺廿

八文養士有田垂學校補天無闕到 楓宸喜今息馬迴瀾後草昧
重開萬井新

鶴嶺

張學舉

于役來何數寒暄候已分西風振高樹落葉趁孤雲海逼魚鹽隱人
稠牒訴紛昏鴉歸去急前路欲成羣

三溪道中

張學舉

山抱平洋水繞田晚禾初刈薄寒天豐年有象吾能繪一帶村場萬
竈烟

霜後山容不帶嵐丹楓如火映黃柑曾於赤日祈甘到未得無情過

石潭

天龍井靈應今年
四月祈雨輒沛

長樂縣志

卷十九下

藝文錄

三

詩

遊天王寺

行人 鄭純禮 邑人

遠公精舍傍溪山一篆爐烟曉夢閒但有投林聯白社不妨漉酒狎
黃冠徘徊雲影長江靜下上鴉聲古木寒識得浮生誰共證好將藜

杖叩禪關

首石凝雲

吳航十
二景

邑令 賀世駿

片石嶙峋勢插天五雲開處首昂然嵐光隱隱通霄露翠蓋亭亭裊
瑞烟旂鼓分張遙點額郎官卓立近齊肩山鳴自昔徵靈異蒼鬱還
看毓後賢

壺江泛月

壺江瀲灩漾晴波乘月泝流趣轉多一派清輝橫素練片帆烟景接

明河樓臺倒浸排晶殿島嶼環開列彩娥夜靜風恬誰鼓棹鏗鏘彷彿奏雲和

龍潭曉瀑

潭雲靉靄覆天梯一道湘簾挂碧谿勢猛欲翻平陸起聲高直壓怒潮低迎風飛沫疑珠落映旭流光耀眼迷劈斷青山分翠白茫茫貫日訝垂霓

寒巖晚鐘

寒巖瀟灑倚郊西傍晚鐘聲出古提逸響隨風環首石洪音度水靜金雞噲呖催邵陽烏落鞞鞞敲殘玉兔低料得禪心清似此無勞棒喝配沉迷

長樂縣志

卷十九下

藝文錄

三五

詩

五峯嵐橫

誰遣巨靈鑿混濛五峯矗立峙蒼穹翠微斷處雲根合碧落涵來練影通雨霽霞光浮疊岫風高瑞色淡遙空參差入望陰晴異指點青靑縹緲中

七巖星繞

西南遙插一峯青七竅玲瓏象列星旁侍郎官羅組綬中涵牛斗燦雲屏三山卓筆騰真誥雙澗分流走迅霆輝媚卽今饒瑞氣遙知地軸隱鍾靈

籌峯積雪

籌峯峯嶺鎮方安每到寒冬雪滿巒青嶂曉開銀作榜蒼巖夜靜玉

翻瀾浮光漸解初陽路疊層猶繞舊講壇對景卻增懷古想白雲無盡思無端

龍角含烟

獨角崢嶸插上台含烟疑自海飛來紫髯半隱千山雨鐵甲如藏萬壑雷雲氣迷濛難覓爪日光璀璨但留艤稜稜已具騰空勢會見甘霖沛九垓

屏嶂鋪霞

列嶂如屏挂望中流霞晚罩氣熊熊斑斕五色迷蒼洞盤鬱千層擁碧穹散綺遙連江練淨騰輝斜接日華紅溪山不數吳航勝第一曾聞品晦翁

長樂縣志

卷十九下 藝文錄

三

詩

靈峯迎旭

靈峯矗矗峙東南高出羣山壯大觀赤羽離天纔咫尺丹崖就日已三竿輝回北極星初斂暈射叢林露尚溥一道紅光籠曉翠分明仙掌捧金盤

梅城弄笛

梅花叢裏斗城懸傍水依山面面妍長笛一聲倚畫閣清音幾曲入雲天興來掩抑情何極吹到悠揚怨亦捐最喜月明風靜候樓中有句憶青蓮

御國歸帆

御國峩峩控海洋迴瀾作鎮引歸航南連交廣分蠻蜚北接溫台萃

井疆雲外空濛容去鷁島門終古任停艚就中什襲饒珍異半是殊
方効享王

南陂紀事

賀世駿

興革原予責經營豈憚勞有懷慚利濟無念不民膏瞻彼邑南壩昔
建璞石閒引泉歸阡陌障海作防閑迨及前明時縉紳復築之仙橋
留舊蹟民賴以耘耔 國朝有衛令來當湮沒餘鳩工拓故址發帑
奠荒墟詎意厯年久滄桑幾變遷屢興還屢廢依然滌成川下隰多
憂澇平疇乏鮮原咸以斗門圯桔槔不勝煩歲當丁與戊憂旱心如
燠村村皆蒿目民命幾難堪余每驅車至日擊心爲瘁欲挽東海波
倉猝未能致遷延年復年進眾謀其始浮議尚紛紛惟予不敢避基
長樂縣志

卷十九下

藝文錄

七

詩

則擴其舊工惟固且堅溪水縈如帶迴環盡湧泉自是六村地斥鹵
皆良田繫惟昔司牧事事爲民福不見白公渠至今猶尸祝又如錢
塘隄負郭巨虹霓迴瀾作砥柱無能害我畦愧余遠不逮焦思凡幾
載今雖幸觀成民力已云殆覩茲水悠悠轉增我綢繆昔日曾如此
今朝胡不留以此懷慷慨聊爾載歌謠

愛日堂

楊榮

高堂有慈母蚤歲失所天熒熒撫遺孤辛苦人共憐孤年日已長篤
志勤簡編蜚聲列科目接武瀛洲仙霑此祿養榮綵服何翩躚芝蘭
與玉樹滿眼羅曾元愛日有餘懽絲竹喧綺筵悠哉桑榆暮永矣樂
長年

前題

曾 榮

鶴髮慈顏祿養優賢郎文采動瀛洲遙傳仙母供桃實又報詩人咏
柏舟愛日金尊娛暮景承家玉樹照清秋不須更問瑤池事已是人
間第一流

前題

金幼孜

白璧易為玷寡居少完節宛宛令母儀娟娟抱幽潔二十失所天中
道遭飢餓秉心靡他適誓語弗回折高堂何巍巍翠柏凌霜雪遐齡
介眉壽暮景耀黃髮有子足侍養有孫足娛悅堂前綵衣舞堂上旨
甘列懿德及鄉閭清風敦閱閱載誦柏舟詩永言播貞烈

前題

明侍講 學士 沈 度

長樂縣志

卷十九下

藝文錄

三

詩

阿母期頤鶴髮新貞心堪擬孟軻親喬松偃蹇風霜暮萱草涵濡雨
露春封誥定看頒綵鳳階庭今見出祥麟百年節操同金石餘慶綿
綿啓後人

前題

明侍講 學士 李時勉

一自歸名閥多言肅令儀鴛衾空有夢鸞鏡忽含悲容鬢應誰惜堅
貞祇自持矢志心當皎日不愧柏舟詩清霜凌峻節白髮際明時林筍
寒猶出堂萱晚更宜萊衣榮玉闕仙果進瑤池潘岳還能賦唯應獻
壽卮

前題

明給 事中 陳敬宗

天道豈云遠福善良有徵孰謂賢且良而不臻壽齡秉德諒柔素履

行完以貞婉婉閨門中令善難具名神相慶彌集齒稚顏逾頰華髮
坐北堂春言和且平瑤水諒匪遐永矣樂長生

書楊都督夢斗忠烈

夏允彝

腥風吹沙搏毒霧中原殺氣生愁暮三宮駕挾蒙胡塵北望穹廬心
傷仆當時猶餘將相才楚囚對泣胡為哉楊公統鎮維揚土虜騎驕
陵城崔嵬公獨身當數百戰忠勇協力詎能變巨蛇蜿蜒淮水傾明
堂壘暗搖荒殿金牌鐵勒走如飛賊鋒焱滅天狼箭危敗不辱臣所
當長江濤怒忠魂濺至今英烈三百年上與日月耀蒼天魂兮應同
屈胥遊我來守土為公傳邨祠歲歲永歌薦波流魚舞悲管絃迴歎
賊臣名湮滅萋宏血碧生重泉

長樂縣志

卷十九下

藝文錄

三

詩

鄭節婦

為李錡妻作

明知夏允彝

自分鸞枕浥珠痕碧嶺青霞何處存不謂靈犀金案寂甯知彩鳳玉
泉溫蒼津有翼能填海聚窟無枝號返魂祇得孤城終夜月荒荒干
古照君門

鄭節婦行

為陳拱辰妻作

前人

孤雁失其雄銜羽不敢呻修翰拂寒霜是君百年身辟塵來西疆馥
郁清我襟照月沉水珠是君百年心肅肅素幃涼宛宛輕雲變挾刃
難獨生是君訣時面蒺藜蔽匡牀當處淚成雨雖處不如汝是君訣
時語策馬向東南白晳揚清姿回頭顧阿母是君襁中兒日月忽已
老不知光景遷幽處終高堂示爾蘭閨賢

陳節婦 為逢榮妻作

前人

君不見霜中松葉寒枝冷挺高峯君不見階上蘭風靡芳氣來無端
垂柳春禽鳴且暮蕊蕊落花飛空擲度麝烟不煖重錦衾此時閨閣正
傷心獨有鄭婦貞金石專心壹意只如昔皎皎月明高樹顛黯黯日
向空庭夕紗窗影暗鏡臺塵自此流光愁不釋仰視黃鵠雙翱翔沈
吟苦恨無羽翼寧帷欲逝從夫君顧嘆嬰雛復惋惜人閒伉儷各安
然爾獨何為罹此阨白髮零落歸山阿寒柯風悲墓草碧狐號兔走
人蹤滅清風流照夜無斃

鄭節婦 為陳奇旭妻作

前人

重幃白髮見貞姝心是青霜秋水餘為報金閨怨孤帳好移明月照

長樂縣志 卷十九下 藝文錄

罕 詩

寒襦

妯娌雙節 為吳國和妻陳氏吳國泰妻張氏作

前人

接葉芳堦怨落英鵲飛黯黯各傷情舟移獨劍還秋水匣守雙珠可
夜明庾嶺新枝分蕊色荆門澄漢入江清何時天語從容下報爾金
閨有共旌

王節婦 為陳維揚妻作

前人

璇閨亶幽姿惠心淑且閑輕雲扶素質嚴霜照清顏結禰甫及笄信
誓矢河山鳴梭露纖指寶花鑲髻鬢願為雙黃鵠霄漢同翱翔何圖
單其翼綺年喪所天悲風來空房荒草蕪庭前隱痛味昏旦終朝哀
涕漣拮据能食力破竈無沉烟勉慰高堂心甘旨微勞宜脫簪營元

室同穴固所便灼灼園中花冬春醜復妍翳翳冬日雪飄飄積成年
惟此貞亮節蘭玉並芳堅耆齒終有涯所垂在遺編劈耳及斷髮對
此慙克全

鄭節婦 為陳應濟妻作

前人

淑媛傷發賦柏舟幽閨蕭索淚盈眸披幃腸斷脂痕冷拂鏡顏摧瑟
韻愁效順蒸嘗捐楚佩承歡菽水典吳鉤管彤熠燿垂芳姓節孝兼
傳古罕儔

林烈婦 為陳登妻作

前人

翮彼鳴雁集於中林有雌有雄亦附其翮羣飛相呼其音啾啾翮彼
鳴雁集於苞桑爰飛爰止而頡而頽出林求食投彼粟場有雄邕邕

長樂縣志

卷十九下 藝文錄

聖

詩

飛鳴出谷有雌綏綏岑居遵伏彼飛孔羣我居伊獨 終風暴矣零
雨其漫維彼雄雁三日不還彼雌求匹憂思樂樂有鳥告我宛死河
干 人亦有言維我實勞生虞投羅死虞飼鳩何俾爾鞠翼折羽
願言求爾復爾故巢求云伊何於隰於原復之伊何曰荷而騫有求
無復哀哉難言 芒芒通魂悠悠故里何墜之巒何潔之涖欲卽爾
居遠終莫致瞻仰昊天甯不遘死

陳節婦 為李宜可妻作

前人

賢媛生芳族温淑異凡姿執節侍伯鸞靜好諧桐絲高堂有舅姑
煢煢待餼醢織紉奉甘旨寒燠得所劑良人好遊學買釵供斧資
奄忽傷離鶴隻羽鳴高枝素幃恆慘淡痛絕情難持援琴操黃鵠
中夜同

哀嘶曜靈何短促在苒厯歲時霜鬢嘆飛蓬堅貞及暮遲苦節同陶
荀千載獲聲施

頌賀相皋邑侯德政

鄭愈

魏我瞻首石淑氣滿雉桑吳航花作縣南山鬱蒼蒼我侯鑑水英蕊
榜擅名場烹鮮試瘠邑經濟根文章八載勵冰檠撫字勞海疆郊原
間疾苦不避暑與霜朗然秦鏡懸翦棘蘭自芳民依先水利百室盈
倉箱濱澗禾郁郁南陂水湯湯煥然新 聖域式廓舊宮牆延儒廣
厦屋割俸資書囊勸課分藜火攷藝親丹黃文洽濬清浦文運日以
昌鑠闡頻校士驥足盡騰驤狄門桃李滿鄴架玳瑁裝百年邑無史
前事弛不張侯具班馬識苦心重參詳天祿富奇字龍威出闕藏愛
長樂縣志

卷十九下

藝文錄

望

詩

憎弗之恤要使公道彰從茲文獻炳百世垂綱常侯本璠瑜質清音
發琳瑯侯本濟川才閩海渡慈航安成山翠律章貢水汪洋緬維賢
侯風永以被吾長

前題

林調燮

長邑揮絃地南來解阜風務農敦政本課士擅宗工文武宮牆峻春
秋享祀隆量才呈玉尺作史倒書筒湖濬膏常渥陂成利靡窮士民
均戴德峴石紀膚功

賀相皋夫子

林振采

帝咨良宰涖吳航政蹟長垂邑乘光學校教思輝泮藻陂湖遺澤在
甘棠兩朝人物鐘彝重百里溪山翰墨香幸附門牆邀一第歸來猶

白愧荒莊

虞廷三考報循良卓異今看擢上方北闕承恩新捧綬南陔孝養慰
焚黃千家擁道攀轅切十月躋堂獻壽忙應識

聖朝多雨露鑑湖春色屬知章

題敬和堂筆訓

江蘇 巡撫 梁章鉅

吾家桑梓地江田溯鄉井

余先世亦家江田由江田入省

德鄰陳氏宗累葉書香永

族彥推常于師門業同請壯歲賦鹿鳴我仲宴同頌

余兄弟皆與常于同受業於孟

鄉賢師先仲兄又與秋榜同年

因詳內助賢舉案相箴警經史羅心胃脂粉氣全屏

淑德佐修齊幽閒更貞靜和鳴二十年分飛忽悲哽良人志未酬空

房月已冷惓惓繼述心課子一燈影貽穀筆鴻篇荻微流光罔巾幗

長樂縣志

卷十九下

藝文錄

聖

詩

中鬢眉大義日星炳合我展讀之寸心倍耿耿舊雨感山邱秋風悵

暮景願言告佳兒承先惟自省

前題

宮太傅 諡文忠 林則徐

漫天風雪一燈青檢點遺編見典型柳下蓋棺誰作誄機前畫荻有

傳經父書能讀慈魂慰母訓長留信史馨墓草故山霜露冷應嗟子

季尚飄零

時孺人季嗣宗華留滯青門捧筆訓來謁寓邸

前題

光祿 寺卿 楊慶琛

下筆千秋著闔儀大家才德兩兼之合教咏絮銘椒輩簾幙春風拜

女師

頻年茹蓼有誰知帷月機燈血淚時今日克承弓冶志九原隨唱笑

開眉

前題

建甯舉人張際亮字亨甫

同心廿載肅牛衣風雨無情冷夕暉天上玉樓高唱罷人間畫荻已流徽

吉光義括十三經字裏行閒盡典型嗚咽不堪多病日倚匳把筆影伶俜

百年一瞬可憐蟲惟有斯文壽世雄誰似東征推作手龍山爭拜大
家風

青衫黃葉一燈初展卷潸然淚滿祛我亦鮮民同弱息十年風樹泣
泉魚

長樂縣志

卷十九下

藝文錄

四

詩

林茂樹妻陳氏題詞

姑目盲氏同夫以舌舐姑目歷三年姑目復明詳通志賢淑傳

林調梅

天眼未曾合姑目能使開匪惟舌是瘁直貫以靈臺矧有同心人至
孝天所哀絕勝金篦刮一掃銀海埃姑目後可瞑婦心今未灰寄語
人閒世何天不可回

又

王溱

兩目雖盲視不忘子賢婦孝舌皆香事親只辦虔誠在絕勝金篦刮
眼方

又

趙新

姑喪其明婦心敢安姑明頓豁婦力幾殫至誠感神大孝不匱彤管

千秋徽音靡墜

賦

吳航賦

公有江田古槐兩賦詞繁難盡載載吳航一賦以備文獻

陳省

客自古槐歸告主人曰古槐山川形勝洵如足下所詳矣然足下非生於古槐而遷於吳航者乎昔人歌綿之什矣其辭曰民之初生自土沮漆歌有聲矣其辭曰作邑於豐宅是鎬京古槐者固貴宗之沮漆也吳航者其貴宗之豐鎬乎且古槐為都鄙吳航為邑治詳此遺彼恐亦未備主人避席而言曰昔人賦三都則締思十稔賦兩京則十年乃成予以衰老之齡愧張左之英不量力而賦古槐乘聞見以集并雖不嫻於辭亦已憊予精安能復執吳航之役組繪以飫吾子

長樂縣志

卷十九下

藝文錄

望

賦

之聽雖然古槐吾祖宗之淵源在焉吳航先司馬之精神寄焉敢不略陳其大觀而粗敘其一二憶自肅皇之乙卯島夷煽禍於滄溟先司馬因氛祲而避地余奉杖屨以入城越己未而寇復至人議徙而走郡先司馬慮先去之為民望力勗屬而獨奮躬乘城立睥睨散金錢出醪糲士夫於是同心卒伍為之盡瘁倭奴倏爾宵逃金湯屹然雄視使先司馬而常在新甯茲城幾何而不墜於航為有功豈一家之為備然仍儼居以棲遲閱數歲而始考卜結茅椽於東門即今所居之敝屋坐三台與芝山亦南向於鼇麓蕃椒條而叢芝蘭循肇基而聚族余徼天幸於此中馳君命於王國既掛冠於夏門奉甘旨於家食每從故老而採風縱觀山川而省域凡邑中有創造覃捐資以

助力既補弊而鼎新或復古而舉廢以此建置之原由風土之大勢
可指掌而俱陳不循軼而悉計請以應子之諮諏敢願蕪言之匪麗
逃滂上元唐年號之初實置茲邑之秋由新甯而移此據海國之上流

自武德有長樂之號又舊呼曰吳航頭或傳夫差於此而略地舊志或

傳夫差於此而造舟新志經史雖所不載相傳夫豈無由元和既省元和

三年省長樂入福唐縣而再建五年復置天福更名晉天福開偽閩改閩縣為長樂為安昌而旋易次年

復名長樂宋元憑乎舊稱皇明亦因夙昔以其山嶽於後則六平之山乃

邑之主連三台帶首石三台在六平左右則首石並巍峩而比尊引兩翼而為輔

於前則銜六鼇瞰五馬岫岳芬葢豐蔚廣野恍几案兮可憑更逶迤

兮高下於左則芝山之秀隱隱東偏含雉雠而蔓衍接六平而勾連

長樂縣志 卷十九下 藝文錄 巽 賦

於右則南山翠嶽鉢盂相倚鉢盂山名陰樹鬱其蒼蒼浮屠屹乎高峙又

有金雞龜息俱山名在縣北十里金斗龍臺俱山名或巖嶙衍鬱礪之脈或屹嶠

起闐闐之隈或外列都邑之保障六平首石俱在城外之北六鼇五馬在城外之南金雞龜息在城外

之北龍臺在城外之西北或內拱井里之奇觀芝房菌蠢其上南山芝山皆產芝玉液洞

出其閒於是川瀆則有觀音資聖觀音溪在縣東資聖溪在縣北鐵爐九溪俱在東門外

發源諸山之上分注峭壑之涯循垠隄以潛滄激魄魄以漣漪有自

北而入港資聖有經東而充潮接滌灑兮西漑迸岐兮南漂鍊爐道洞

沿而衍派勢澗瀑而通橋觀音溪通太平永甯二橋入江六平山水通下櫓橋達水關入港資聖溪通資聖阜

民橋會下櫓橋鍊爐乃衙裏楊俱在之井太史在縣西金斗山下太史周

由新橋達普照橋元飲新廟下義在縣東之泉胥山川之餘潤均民食之所關又有

此

河頭以下皆浦名柿浦官庄以及厚德天王五浦在城外之西南乃溉田之別浦亦

溜海而汪洋其城廓則創於宏治之三載知縣潘府創闢於嘉靖之中年

嘉靖癸丑巡撫王忬巡按趙孔昭請城長樂遂發帑金萬三千餘緡檄知縣詹萊董其役創則開四門東六平西雙江南十

洋北首石以出入關則加平政於西偏西南門日平政又肇錫以嘉名東日鎮海西日清江

南日陽春北日拱極皆令尹詹萊之親鑄洎己未之被倭侵三晨而不蠲倭攻城三日

故先君之死守令保障之依然嗣是而後規制愈全造敵臺以覘

遠知縣戴時望造濬溝洫以潑旋迄年久而就圯發公帑直指劉公應龍而肇修予

助金以陳永壽名助金四百餘兩與捨地舍近城田廣三丈縱七十餘丈亦桑梓之是謀窪於風

雨者復完凹於淤斥者再起既增於上又固乎趾障隧轍轍重轆纏

纏關局加其縝密譙櫓壯其雄視塗以哲飾尤資觀美跨山麓若玉

長樂縣志 卷十九下 藝文錄 賦

虬連厓隰如素綺又遴獷狻以司局鑰守城民壯二百六十名總甲四名聚軍容求

方畧蓄戲藏銳利鋸鋸雖昇平而飭備場演武於南郊聚民兵而

閱練排魚鳥而鳴鏡近海上之多警益省卒之悍趨苞桑彌以鞏固

風雨無從漂搖以其經紀則邑治之署負六平而為基峻堂廉以出

治映山光於庭階入水聲於廳事庫有國賦軍籍之藏架閣庫藏錢糧鏹鏹鏹庫藏

房藏軍籍黃冊倉有際留預備俱倉名之異又有義倉東平西平總之皆西荒

之利義倉大合彭哲與建東平西平大合盧龍雲建子捐百石入義倉借南山以呼嵩祝聖道場在南山三清殿

於縣南而作泮南山之祝聖場向荒草之歷亂泮宮之明倫堂亦隨

墜而頽漫予佐邑侯以經營故極一時之壯觀倚鄉賢與名宦原並

祠於膠庠緣先司馬之入祀萬曆辛卯先司馬入祀鄉賢祠余捐貲併二祠而建宮

牆又有雙相之圃以觀士德在南山塔下學租之田以為士資御史有巡

行之臺在縣治東藩臬有居停之司布政司在縣治東按察司在縣治西鋪舍通往來之役

原在縣西大令彭哲與移於縣後公館為行旅之依在察院西今改東平倉若夫街衢則東西

及北十洋城隍俱街名胥吏坦而瀟迤通廣運之都莊里閉紛其對出

軌躅合於周行以上皆城內之街河南城外邊江流之路嶺口城外通南北

之鄉其巷則後坂大園東賢府埕五通金厝上下太平有太平上巷太平下巷

湖井以上俱縣東巷楊井以井得名巷內有井上巷在西隅下巷在西隅上下殊

程高隍衙裏綠衣以下俱縣西巷連閩夷塗曲術支派縱橫自崇期而分出

取岐旁以為途尚輪囷兮難數總東西兮兩隅縣治內有東西兩隅總六圖其橋

則下櫓在縣治東永濟在縣東儒學前資聖阜民俱在縣後跨溪濟涉通渠控濱太平

長樂縣志 卷十九下 藝文錄 巽 賦

有觀音之呼太平橋在縣東舊觀音寺今改察院橋俗呼觀音大令蔣以忠鑄太平橋於碑焉南陽出朱明

之闔南陽橋在南門內陽春馴雉建自予身拱鼇東出三橋並新馴雉亦名躡鼇與陽

春皆南達鼇山拱鼇東達鼇山皆予自建塢前縣治西以柿浦城外金斗水通新橋普照

俱在城外東九溪攸同迎春城外東大令蔣以忠豎迎春橋碑以迓青陽永甯舊名潘公

在縣城外西南半里舊名奎橋又云庵頭橋宏治辛亥知縣潘府重造改名潘公橋隆慶六年知縣蔣以忠建亭於北改名永甯己未倭

來斷橋阻之子重其坊顯揚科第則狀元與狀元而對峙元坊為永縣治東狀元坊為永

樂壬辰狀元馬鐸立縣治西榜眼在縣治前為子元從祖並進士在

狀元坊為戊戌狀元李騏立永樂丙戌科諱全立並進士在

洋街為正統乙丑進以崢嶸九德見同榜之盛九德坊正德丁

士李叔玉立嗣燬在縣表吾邑之英登瀛坊鄭憲陳文沛鄭源渙陳毓賢莊在城外西登瀛即馬江亭表吾邑之英知縣潘維春陳嘉謀林公黼戴玉成立即馬江亭表吾邑之英知縣潘府建列皇明以來科第後屢建屢燬隆慶三年知褒崇碩彥則都憲縣蔣以忠重建萬曆二十八年知縣盧龍雲重建

為副都御史 繡衣為御史 忠諫為林公黼立以上俱縣 尚書在縣治

尚書林 正學因乎紫陽 盧龍雲改激揚以正學 文化暨於郊墟在東

為林坦林垣 親棹楔而仰止 景先哲之步趨 興賢在縣治 期賢豪之

並奮崇正在東門文 冀正道之弗渝 十洋在十洋街之中 迥於南

際仁澤十洋仁澤坊口市相沿已久十洋市國初因三寶太監使海

元今惟集於仁澤之衢 大令鍾萬祿暨頤以誘 須文運之隆盛 占佳

讚之有孚 彼列肆之苞羅 均水陸之珍錯 無些窳以相欺 不射利而

高索 以其祠宇內則有城隍之廟在縣 臨通路 瞰清溪面資 朱門聖

宇 鏤篆崇階 伏臘充斥 靈瑣祈禳 感慰民懷 余既修葺於前歲 令充

拓與眾偕功 於有邦者 宜報典則 令甲乎可稽 汾陽廟名水 之祀 令

長樂縣志 卷十九下 藝文錄 賦

公實為社於予里 已未倭奴來寇而攻城 青蚨由廟飛出 若糠粃倭

奴見皆着紅之神兵 由是銷魂奪魄而徹壘 有司春秋享祀以報功

余亦增卓楔於前址 若高隍在縣治 與祠山在十洋街 悉明神之所

止 俱降釐於生靈 故血食而不已 外則有文公之祠 考亭居於上方

四賢黃榦陳枅 列於兩傍 考亭昔遊乎此地 四賢相從以翱翔 邑人

貌像而立祠 年既久而朽腐堪傷 像已壞於風雨 屋將傾乎棟梁 子

頻過而心惻 三值賢侯 遂毅然而擔當 郊原擁翠 乎瓴甓煙霞 隱耀

乎桴枋 堂鼎新乎崇正 閣高駐乎文昌 子亦竭蹶而効力 冀斯文之

興起 騰踏而飛黃大令彭哲與郁文周盧龍雲相繼捐 其寺觀內則

有天妃元宮在西隅南 三清紺殿在天妃宮之左 子浮屠屹於峯頭

天妃宮後有南山塔舊有寺今廢蒼翠繞其四面外則有天王之寺舊羅列乎諸景

今傾圮而盡失寺內舊有烟羅亭望江亭清心亭僧構堂而焚修隆

四年僧重建經堂小軒二座子扁其額曰天王斗名尚仍乎昔日東

利近建山門大合李奇珍助貲余亦共成其勝其登眺之所北則有首石之頂六平之巔伏崆峒於

有關王廟資實子弟鬯之所出

目下攬溟漲於曾前降而下也則有小有洞天如有剏墅小有為子

習靜之小巷如有乃兒供余之樂所南則有予鼇山小圃鼇頂飛樓

擬舫之軒廢今棲隱之巢網牖戶若蝸角結茅茨以臨流雖未能比勝

於辟疆亦庶幾逸老之菟裘又不敢局泌衡以專獨樂亦嘗飭青衣

以迓來遊其閭閻則塵閉撲地槐栢簇雲夾溪傍山櫺次鱗紛啓荒

拓架比屋連藁剝廬之戶緹獵劇驂之塵叢駢亦有高門當衢向術

長樂縣志

卷十九下

藝文錄

辛

闕擁冠裳街聯巨室陳則有藩籬土庫派別祖同大園與大厝異族

國佐與新局殊宗梅亭上巷頭宗玉宿茵打銀水窟亦名為陳街乾

利邊牆下連江均是吾廬之鄭下鄭下董上巷靴桶共結亢宗之盟

去聲更有楊井並為同姓明堂崎下子長鋪司雖共姓氏實別宗枝

音孟高厝之游龍門高瓊甫生五子末子景和洪武初贅邑東游子定女

越三世高惟用景泰七年貢充國學上舍生遙授承事郎歸譜載性秉純良處事

寬厚為廩生時鶚之祖陳厝之柯始因出贅久而遂訛仙路之李上

下之李國元之王虎厝之王務西橋之王俗呼俱盛稱乎世胄尚緝

續乎書香濟濟冠蓋之里郁郁文獻之鄉又有遷自鶴嶺遷自湖南

遷自壺井既胥宇之孔臧而閔閔之遂永先君子以迄茲亦五世乎

相延雖不敢與昔時王謝之家伯仲亦庶幾今日陳鄭之族後先其

下鄉之路東有石岳嶺名達十一都十二都北山嶺名達九都北有

鶴嶺達十三都十四都十五都南有龍門嶺名達二都三都躡培塿兮

穿翳蒼過膏壤兮攬平原遐阡邇陌兮壇漫迴溪峻湍兮騰喧或臨

高嶼而飛瀑界道或俯重溟而崩浪湧奔靉黷祥集於仙窟雞犬聲

匪於平村禽魚果木之產四出麻絮絲紵之物交蕃其江滸之津則

有河南埠頭在河南街新渡二津俱往會城連江馬頭在縣西登瀛坊暨其上乃吳航

之舊址古吳航頭即其地為濟涉之必由江之港曰上下隔半野而分流二港

中隔半野山由東而上曰上港由西而下曰下港上港則迎潮而出大江下港則遡洑而出大江俗呼上下洞總會合乎馬

江由上港則趁潮直行過馬江由下港則於港口待潮而過馬江廣溟濤而四周馬頭江有四達之路東達閩安鎮出

大海西由鼇頭江往福州南由西峽江往興泉下路北往連江中有石兮若馬潮既回兮始浮颶颶

長樂縣志 卷十九下 藝文錄 至 賦

起而浪湧勢芻芻而喧虺篙師振舵而稍舛飛舸觸石而難迴亦有

中流而洪飈四發遂致壓桅而沉覆莫持肆馬江之云險質以此之

為危倘操舟之維良亦往來之甚夷以其人物則山嶽之所毓名川

之所生入大唐而肇跡羨卓雲河南人乾甯四年及第之儒英賦有未明求衣

之號詩有駕幸問善之名雲及第作未明求衣賦駕在華州詩問善如扣鐘詩崔若愚下櫓橋人用薦

舉為縣丞之試邑丞施祐東隅人用薦之贊地卿既諸科所薦舉自才卓

而譽橫陳轉縣南人梁開平中任潭州判官之舉於五代判州務於潭城又有繼於

此者偉哉有宋之諸賢也西有歐陽回邑西人端拱元年進士東有王彬邑東人

化三年 聯一時之盛嫩均九列之貴臣回官太常卿彬官太常少卿祖挈家於高

麗彬祖挈家 彬負笈於成均彬以外國生遂登第而通顯與陳良而

麗高麗

為倫趙冢宰趙以夫字用甫居邑東芝巖以宗子登嘉定十年進士官吏部尚書兼侍讀之官績始發軔

於吾閩初知漳州奏曰食於樞府嘉熙初為樞密副都承旨抒忠諫

而諄諄疏定儲之祖訓時國本未立編類仁宗高宗兩朝定儲本末具載諸臣諫疏及舉行次第以進慮國

本而畢陳稽往迹而興慕雖千古而如新陳毅為大園之鼻祖致常

致一尤陳氏之亢宗致一發所未發於揆昌之同榜百嘉應父干城

之願生平克盜沒出神兵賜廟號平忠通嘉子千期期子子椿稱名

儒而號良牧子誠與西山講鄒魯之學子愚知營道有廉吏之風陳

容之被擠於賈似道也節幹凜然風生而二子象賢猗歟盛哉真匹

謝庭之瓊矣陳毅字子中宋淳平進士歷御史憤青苗之弊贊鄭俠上流民圖五遷知賀州勦下槽橋致常性至孝父歿結

廬墓側累徵孝廉不起嘗曰弟致一倘為吾皇施德惠兒百嘉倘為

吾皇樹干城吾願畢矣百嘉破金師平克盜死出神兵平峒寇士民

長樂縣志

卷十九下

藝文錄

奎

賦

上聞寶慶二年勅賜忠通廟致一子百揆百昌同榜進士千期為百

嘉之子師五峯世稱名儒子椿為百嘉之孫成進士知英德府號良

牧子誠官朝議大夫賜紫金魚袋與真西山講學子愚知營道縣清

操自勵卒官囊無一錢真西山遇其歸櫬陳容字公儲端平二年進

士官至朝散大夫為人耿挺不阿賈似道常欲招置幕下容輒卑侮

之出知興化軍圖經以宋代邑人物第一號所翁善畫龍世稱所翁

龍子夢鳳字以仁淳祐十年進士官至福建都監陳文惠名合字維善東隅人

次子夢發字以道寶祐元年進士官隆興府通判陳文惠善東隅人

淳祐四年進士德祐中拜翰林學士國子祭酒工部尚書同僉樞密

院事勅諭制册皆出其手儕輩咸服其能官終宣奉大夫資政殿學

士諡文惠之代煥絲綸也文章燦然服眾而兄弟繼美合兄剛翁字維嘉寶祐元年進士官

至判院南劍州第誼字維道嘉熙四年進士上疏養親授新班教授庶幾匹休不愧河東之鳳矣陳子

冲縣東人淳祐雖登甲第未見施為歐陽榮縣西文行坊人累舉不第紹聖四年因獻板橋

之利賜特奏各官太子中書謂之特奏者宋制舉進士第累科不中

閱貢籍已經十五舉以上終場者賜出身謂之特奏各以別於正奏

名進以建言而荷寵陳謙厚字叔賓河南人淳熙十一年特奏從特奏而出身維彼

士也

鄒異字仕奇邑中行邁等夷事親順志廬墓永悲天有甘露芝草之

應鄉有經明行修之推應元祐三年賓賢文行千古名馳有司改其

文行維天地之位既定而太和之氣以填我太祖之興也明詩書於

歸焉之後肆懿德於囊弓之年開科則陳治祖字伯禮嶺口人洪武

官長洲為之首薦辟則李聰西隅人洪武三年以擅其先若葉允吉

知縣西隅人洪武四年儒士陳震字敬修西隅人洪武二十

中式授博羅縣主簿陳震年舉人官金華府教授陳謹字士默

陳震同年官陳京字叔諒河南人洪武二十或棲鸞鳳於枳棘或咏

棠陰於專城或傳經於寶婺或作人於周京若林谷祥吳航頭人洪

士薦任番陳宏道西隅人洪武十八年以儒士鄭經東隅人洪武三

馬縣知縣薦任湯陰縣知縣國佐之祖鄭經十一年以明經

薦任翰或為侍從之清臣或為嗅咻之循吏或彷彿吳公之治平或

林簡討或為侍從之清臣或為嗅咻之循吏或彷彿吳公之治平或

長樂縣志

卷十九下藝文錄

追蹤魯恭之卓異即老人若鄭伯高東隅人洪武二十四年以亦干

里而為師帥蓋國初薦辟科目並行故英雄豪傑四出槩自文皇以

來而賢人踵武才品當日齊高事業更僕難數陳昌字叔能西隅人

年應天禮魁第二名官西安縣教諭土庫陳鴻李珂西隅人永樂十

漸之祖鴻漸嘉靖甲子詩魁第二名祖孫濟美王錫嶺口人永樂二

縣教則以學諭終池鯨字景大東隅人永樂三鄭澣字德新西隅人永樂

白訓則以司訓止劉應字順叔西隅人永鄭澣字德新西隅人永樂

之鄭雲西隅人永樂三年貢相比均未林烜嶺口人永樂九一官相趙遂已曹

賢登第字叔善永樂十三年階惟博士豔陳灝字季周縣西人永樂

西按察使新之榮陟於觀察也其一時之具美乎冠惠文而貂璫寒

局陳容之後灝為交趾道監察御史總少臺而豪強斂趾灝在陝西尤以彼君

心疏劾中官奸貪置於法總少臺而豪強斂趾灝在陝西尤以彼君

子兮不素餐兮殆謂是歟高不仕若鄭文霖字汝眾號馳犁子邑西永甯坊人應辟不仕所

著有賦犂卷練子甯祿千鍾而弗顧此堯舜之巢由夏商之卜務有

為之賦崎下鄭之祖令子霖子萬奎字孔明西隅人宣德四年舉人官廣州教授

人永樂二十一年舉人官李叔玉孟玉之弟宣德十年進士官戶之

審府教授新路李之祖兄弟繼起鄭錫文字禹範西隅人宏治癸丑年進

十二年進士官刑部主事員外郎諫武宗南巡廷杖降通鄭源渙字與聚錫

同管高州府同知事與先司馬同僚擢桂林府拂衣歸父子齊

名孟玉曳裾有賈傳之憾叔玉工詩希李白之聲叔玉博學有梅

文遭逆瑞而節礪拜南京監察御史時逆瑾竊柄臺諫皆其私人文

事御察屬而法明引病乞歸瑾銜不附已遂奪其官瑾誅起雲南僉

清風勁節千古如生源渙觸天威於方熾武宗南巡渙與邑人林

長樂縣志藝文錄卷十九下念

同志於既亡創甚仍匍匐為格君信友視考有光陳良珍字聘之東

十二年進士官南京戶部以高第而為郎鄭舜治字師錫西隅人正

主事員外郎藩籬之祖以高第而為郎鄭舜治德十四年經魁明

堂下以高魁而不壽陳瑄字孔璧西隅人宣德四年舉人官甯

字希白東隅人成化七年作相於宗藩陳希孟字養浩西隅人正統

以儒士中式德府長史作相於宗藩陳希孟三年舉人丹徒縣知

縣陳德成字敬夫西隅人天順六年舉人為政於百里陳澧西隅人

年貢官楚歷官於王邦陳祜西隅人例貢官司教於濟水正諭則鄭

府伴讀則隱東隅人嘉靖開陳昊字孟高西隅人宣德元年陳敦字則禮東隅

舉人官定陳澧字叔源西隅人正統三年王德字志明西隅人景泰四

海縣教諭陳游年舉人官零都縣教諭王德字志明西隅人景泰四

王恩澤字以惠東隅人王德同年武陳贊字日襄東隅人宏治十七

緣縣教諭是為磨王之祖陳贊年舉人官海陽縣教諭

陳景淮字景清西隅人正德五柯文寵西隅人嘉靖年王景大西隅

年舉人官長清縣教諭柯文寵貢生陽江教諭

化元年貢官乳源 **王浴沂** 嶺口人貢官 訓導則林章 字德之嶺口人

縣教諭虎厝之祖 六年中式官常 **李時舉** 東隅人成化五年 貢官歸善縣訓導 **鄭孟進** 西隅人成化七年

州府學訓導 **陳洪** 西隅人成化九年 貢官開化縣訓導 **林珀林塘** 嶺口人宏治六年同貢官 陳公盛

西隅人貢官 **陳宗禮** 東隅人貢官 順德縣訓導 **陳時雨** 西隅人宏治十二年 貢官英德縣訓導 **王文**

蒲州訓導 **誠王文誥** 西隅人兄弟 俱任訓導 **林仁山** 嶺口人萬曆二年 貢官任訓導 **贊政則陳洙** 西隅人 宣德二年

年貢官甯 **田滋** 東隅人天順元 貢官南京經歷 **謝坤甫** 東隅人宏治二年 貢官思城州吏目 **為郎則高**

都縣尉 **惟用** 東隅人景泰七 年貢官承事郎 **陳文明** 西隅人成化三年 貢官 養親恩授從仕郎 **彼李錦** 西隅人正 統六年貢

張仕祺 西隅人正統 十四年貢 **鄭庾** 西隅人宏治十年貢 **鄭珩** 西隅人 例貢 行則無

考宦則未成凡茲諸君或淆玉石或戀林泉或限資格或斬天年肅

廟中興多士彬彬李懷靜 字守中號平山東隅人嘉 靖四年舉人官香山縣令 **之烹鮮於香山**

長樂縣志 卷十九下 藝文錄 垂 賦

陳朝慶 字孝卿號梅亭東隅人嘉 靖元年舉人官安仁縣令 **之製錦於安仁均能據其所學胥**

得宜平民人美諸鄭之濟濟紹世業於振振英發若錫麒 字維禎號 子郊西隅

人嘉靖甲午舉人乙未進士安慶 少年科第僅承韶郡而佐嚴津亡 推官陞韶州嚴州同知楊井之祖

乃鋒芒之未俚練達若錫澄 字惟志號竹庄西隅人嘉靖 七年舉人官舞陽縣令下鄭 **宜駕千里**

乃合花縣而遽沉淪似亦就元之為屯源潔之 西隅人嘉靖四 十二年貢街乾 **老於**

學究也薦明經而不仕孫子守其庭訓蒼官錫以遐齡豈啻於彼者

而豐於此乎源彬 字與宜號梅岡西隅人嘉靖已酉舉人癸丑 進士壽州開州知州南京戶部郎中街乾 **之刺**

平壽開也擢南戶而返觀惠愛渥乎兩州聲名留於粉署豈其才無

窮而年有盡者乎源洽 字與熙號六巖西隅人嘉靖戊 午舉人官孝豐瀧水縣尹連江 **為余之同年**

性資蓋得之剛直所至臆著平聲稱宦途不免於傾仄竟莫罄其經

綸遂優游以家食事繼母而孝極夔夔友諸弟而囊無私植鄭恆懋為方伯之曾孫少稱穎邵長尤卓犖強記博聞克紹家學竟阻數奇

點額者數僅司訓於崇庠實未售之荆璞陳惟舉字直夫號六溪東隅人嘉靖丁未進

士江西副使廣東錢塘令花封知縣則撫字心勞居粉署戶部主事則度員外郎中

支政舉充養遂之敷施浩乎莫禦壯保障於藩臬也煦日嚴霜並行

有序使其尚躋臚而陟華事業孰得而侶焉而今其已矣陳鴻漸字順

羽號于達陳昌之孫嘉靖甲子經魁官肇慶府知府以病告請士庫令博羅則六事並修佐羊城則四

知自矢香山澳之勞烈增秩賜紫馳五馬於信安也獲上治民咸擅

其美使其不急流而勇退勲業固有未已焉而今且尚壯也陳夢雷

字有震號後溪東隅人以儒士中嘉靖癸卯科舉人永者其謹厚長

康知縣建水知州官止瓊州府同知榮府長史大厝

長樂縣志

卷十九下

藝文錄

五

賦

者乎敷厯州邑而在有澤濡佐瓊九載而家無餘需耀不酬勞竟拂

衣於勞傳之途似董天人之俛首江都焉陳安字勉夫號一松西隅人嘉靖乙卯舉人官

衡山縣尹者其骭躄君子乎三典文衡而髦士盡獲一合衡山而黔

黎夷懌與世相違竟脫徙於鳴琴之席宛陶淵明之歸來彭澤焉阮

琳字孟珂號見石西隅人嘉靖辛酉舉人歷官知縣瓊州湖州通判之操割高苑綽有馥為值凋瘵

之盤錯催科撫字之兼支倅瓊而保邑城歸田而樂棲遲此其義命

自安者也李廷謨字敬禹號宗泗西隅人萬曆十三年舉人知天河縣下李之綰綬天河賑恤孤

弱既刻意於彰善尤究心於瘴惡剛直不容於時甘林泉而獨樂此

其襟期磊落者也李鉞字守和東隅人太學生新道下為李兆林字子璞萬曆十三年舉人之父

身入成均子薦天府身負壯志而屈於簿君子抱長才而鍛其修羽

林用賓與兒立同入賢宮狀貌魁梧綽有蘊藉絳帳屢滿生徒青雲
尚阻長駕屈光澤似淵潛仁風雷之變化陳一夔矻矻修業數戰文
場壯鷗鵬萬里之志短曹劉十仞之牆籲俊上國席賸琳瑯共祝輶
於今日行振鐸於大方林德字有本號壺江壺井人嘉靖丙辰進士官荆府長史陳復升字以靖
見庵鶴上人林德李國珍字應選號梅麓湖南人嘉靖初固不產於戊午舉人官廣西太平知府
吳航今喬遷乎梓里敢併敘其大端見多賢之萃止林德初宰邑高安
抗嬖相之恣睢分宜拒撫臣之索賄剛柔迭用而不屈不阿比丞郡值
景藩之新封德安逢御史之修邳調廣東提舉御史劾閩人指公為黨處置得宜景藩屬從而
無偏無陂甘陸沉而毫無悔弔湘江自廣東提舉陞荆府長史而氣益豪因母病
而辭祿長飲醇而含和年幾衛武而卽世德既隆而福多陳復升之

長樂縣志

卷十九下

藝文錄

五

宦轍久馳驅於粵東增郡鄂而民舍安堵自潮李陞南曹堪守五羊值山海盜起當事者議增
外廓度撤民居百數十閒公訪海塘地沒於故為廣東兵備值朱良寶作亂率諸將犁穴殲之殆盡飭戎政而鯨島一空
身退由讒口之害公李國珍與余同聽乎鹿鳴璞不售而就選自越

滇而發軔

初諭金華陞李曲靖

亦多厯乎粵甸凌江

南雄丞

雷陽

雷州丞

之仁雨猶

霑桂林象郡

守廣西太平

之清風已徧榮金緋而歸田誠卷舒之俱善李

仕黼

原名悍以字行李廷謨之父

之飽學甘谷井以及歿身不隕穫而自適其族兄

曰時康曾作教於滋陽

西隅人正德十二年貢官滋陽縣學教諭

行爲法於鄉鄰德足術

而敬附亦無愧於薦紳愚父子雖已敘於古槐爰徵幸於此鄉某甘
棄於畎畝濬偃蹇於清漳視諸賢以深慙敢韋曲之能望乎尚看吾

邑之多士簇翩翩乎球瑯或續金貂之世業或起白屋而翱翔為楨
榦於王國廣鄒魯於一方追懿行於遠昔歷可畏之名賢第俎豆之
所祀則不能以槩延惟鄭錫文之與李仕黼曰生於吳航之廬其他
儼然而血食悉在野而翩聯因賢祠之附此學宮也敬敘姓名而綴
焉彼出處之顛末則尚待於他編唐有林慎思字慎中大宏里人官水部郎中不屈黃巢
而宋有林安上字民瞻慎思八世孫與頭人官直龍圖閣廣陳宋霖
死東路經畧使因劾丞相汪伯彥黃潛善致仕
字元滂岱邊人官秘陳栢字自修宋霖之孫之祖孫並入劉砥字履
書監與朱文公講學受業朱文公之門
安里人與弟礪同舉童劉礪之兄弟比隆鄭子尚未考蔡通無考陳如晦
子科同受業文公之門
字日照沙堤人官教授與黃榦俱為真西高應松字箕畝與頭人元
山所知所著有論語問答及講義文集
應松不肖草降表元兵自湧金門入舉朝奔竄從官留者九人應松
其一也官端明殿學士僉書樞密院事從瀛國公至燕絕粒不語七

長樂縣志

卷十九下

藝文錄

彙

日陳俞籍長樂寓閩縣官太張紳字蜚卿官朝奉郎左元不歐陽純

卒以大四都明有陳祖字富文十三都人任新繁縣林谷顯十四

人寓居著述儒士解元官朱顯字漢奎謝士元字仲仁官副都黃熙字汝明青山

吏部郎中陳德隆字世美十三都人官甫江上林公黼字質夫仙山

有孝行年諫武廟南陳文沛字維德六都人官陝西高墜字德滋龍門後澳

巡廷杖卒廉陳夔陳豫章十三都人官鄭世威字仲孚二都陽夏人林世章字

政閩四都坑田人官南京謝廷衮杰之父官瓊吾家則仲完名完以字

工部郎中孝友恬靜官左春坊仲進字伯康江田人官江山知縣以德化民以勘災傷忤

右贊善邑全字果之江田人及第第二名修四書五耀布衣精元學懋觀字

質江田人官兵科給事中終廬州府雋字以奇江田人官奉既冠裳

知府居家以孝聞歷官所至有遺愛

之不替亦世德之益裕先司馬之好修業已詳於前賦其邑令自吾生以前不可知矣采列傳而申之自吾生而後有可仰矣因所見而

陳之王想之從兄審知而來也以大夫而躡邑政其唐時之楚楚者

降此而宋勤勞與利則有李葺傳稱其晝夜勤政兢兢不懈瀕海沙京與頭田患涵斥教民築堤防禦遂

成沃勵精敷化則有吳仲舉傳稱其賑貧民杜私謁清操凜然閱希聲之惠教常敷

傳稱其勤政惠民雖方次彭字公述之卓異屢敘傳稱其歷六縣皆有治績宰長樂作

古稱循良何以加焉興士類愛究心水利若蕭竝傳稱其究心水利根括十禱雨輒應若

徐世英傳稱其不尚威嚴不事媵阿嘗伍擇之字元賓汀不阿上以

殘民下傳稱其初出宰長樂時諸司暴酷相矜輒與大獄袁正規字

輔陵由文雅而致太平傳稱其約已裕民興利除害陳字齊

陽人由文雅而致太平暇則論文賦詩有古儒吏風陳字齊

遊之經畫傳稱其捐俸吳一鳴字伯之精明傳稱其緝

述漳州方名翁字次雲之德教則父兄師友之明效也王遇傳稱其

龍溪人方興化莆田人之德教則父兄師友之明效也父羽儀賢而

有文章遇受業朱熹呂祖謙張栻之門與陳淳黃榦廖德明相厚善

合長樂悉以所學施之政事方翁傳稱其為宣義郎威武軍節度

推官方元宋之孫從兄畧官廣東轉運使元宋與二程講學翁既有

家傳又師事朱子而與林光朝施廷光陸子靜陳昭度為友其為政

可知陳昭度仙遊之規隨亦明道講學之功推也傳稱其少有高行

已陳昭度仙遊之規隨亦明道講學之功推也長即明道講學方

翁為秘書省正字時昭度每欽禮之授長吾明邱宗亮直隸江陰人

樂縣合為政一遵方翁成執民多德之王遵道直隸蘇之加志膠

之修舉廢墜傳稱其繕修文廟建山川社王遵道直隸蘇之加志膠

庠傳稱其專務以德化民尤崇學政立詹奎章江西人與王遵

山東人宣以廉明練達顯全章傳稱其莊以涖民明以燭奸廉以律

德間任以廉明練達顯全章傳稱其莊以涖民明以燭奸廉以律

治體躬行以率龍韜曲江人正黃琬豐城以清淨謹嚴揚龍韜傳稱

民民服其化龍韜德間任黃琬豐城以清淨謹嚴揚龍韜傳稱

長樂縣志 卷十九下 藝文

民公餘退食汪正祁門人則吏畏民懷傳稱其忠信明決屬椽屏跡莫敢有舞文者尤有惠政及民

常懷羅敘江西吉水人以上則政平賦均傳稱其平政宰民宣恩風化興百廢均賦役恪守官

箴潘府上虞人宏則偕樂宣化傳稱其平易近民對百姓如妻子每芳辰佳節輒緩遊郊外與民偕

作橋於河之滸以渡行人改南山寺為書院暇則羣髦士講中

建觀稼亭觀農亭改邑內諸佛宮為鄉約堂遵行朱子損益藍田呂氏鄉約以鍾紹東莞則表揚咨詢

正風俗傳稱其清謹勤約始終一節尤重風教境內有孝義廉節者必覈請

表揚之士習民龍琰常德人正愛民於內使征求之日傳稱其持已端莊敷政寬

風為之不變龍琰遺思於去邑十年之餘傳稱其寬

平時鎮守檄郡行邑屢有楊麒字仁甫遺思於去邑十年之餘傳稱其寬

需索琰重擾民輒峻拒之楊麒上饒人遺思於去邑十年之餘

洪長者政尚安平勞心撫字救疾恤饑在縣未期以制去任民若失其寬

怙恃十年餘麟弟麟判泉州道經縣治百姓遮留問麟安否至有泣下汪瑄婺源人

者汪瑄婺源人上疏以蠲租傳稱其政尚簡易不事炫飾時夏旱秋潦

蠲是年田租民為之謠曰天降何應和字景陽視民共其

殃歲卒荒不有二汪誰立我儂何應和東莞人視民共

長樂縣志卷十九下藝文

挈妻孥官舍閒寂賑饑簡訟培內晏如周急持俞名介

危剗豪屏秕豈繫赤子視民亦直以慈親况已俞名介

路號初泉海甯人之為合躬丰采之得觀簷名萊號範川常山楊名

嘉靖丁未進士之為合躬丰采之得觀簷名萊號範川常山楊名

輔南昌人戴名時望臨劉名禹龍三兮接踵周名冕臨川人舉人蔣

丙辰進士戴名時望臨劉名禹龍三兮接踵周名冕臨川人舉人蔣

名以忠字伯孝號貞菴名紹號懷愚湖州人隆慶辛未孫名濂號

常熟人隆慶戊辰進士韓進士與蔣以忠俱隆慶間任孫名濂號

人廣兮聯輪陳名奇謀號海樓嘉薛名繼茂號盛菴雲鍾名萬祿號

東人兮聯輪陳名奇謀號海樓嘉薛名繼茂號盛菴雲鍾名萬祿號

人丙戌彭名哲與號晦虛番郁名文周字文叔號暨湖盧名龍雲字

進士彭名哲與號晦虛番郁名文周字文叔號暨湖盧名龍雲字

溟南海人癸迄今統比清於塵甑壹贊緒於鳴琴欲遊揚而難遍敬

末年進士迄今統比清於塵甑壹贊緒於鳴琴欲遊揚而難遍敬

拔尤而橫襟吳遵者充寺田以給士時有觀音巖泉二廢寺田若干

校為肄業改遠倉以便民縣賦例輸三百石於萬安倉靖誣戍以扶

膏油費改遠倉以便民民艱遠餽導申請改長樂倉靖誣戍以扶

善邑高允實誣併蠲積負以憐貧馬江諸渡稅積逋千餘實心實政

戎籍遵為解脫蠲積負以憐貧馬江諸渡稅積逋千餘實心實政

蓋有相資而成矣詹萊者臨簿書而處決如流風裁英果曠胞與而

形骸若釋暇則盡脫畦畛登眺造城垣而經畫多方時浙東島夷陸

城長樂萊遂以身任之多方經畫俾費不及民民亦樂於趨事城成

萊旋改任寇亦奄至自乙卯迄癸亥每春烽警無虛日民有所恃以

為歸者萊正法紀而奸暴屏跡明法紀申命令該博文雅又為循良

之功也餘緒矣萊博學雄文尤邃於歌行蔣以忠者於免贖金卻商征見其節罷該催濬

濱澗湖名見其仁修射圃復學田見其愛士營坊橋坊衢橋梁多所營砌興社學

見其經綸其惠績之匪屯者乎韓紹者清而持正秉公慈而字孤恤

困教普而青衿樂從法行而赭衣不怨視疾苦若痼瘕之在躬矚幽

隱如照燭而符券其才識之並遠者乎孫濂者以堪輿而自負恆平

易以近民王官之轉公道未伸陳奇謀者敬徹乎表裏子真

長樂縣志

卷十九下

藝文

李

撫字而民懷若母廉介而吏慄如神蠲稅捐費關港通洋陳政難

以一善述績未可更僕陳鍾萬祿者英明爽朗威不廢恩廉以生明

催科有法期奉公而先利下聽斷惟公不傾法而亦原情築防而斥

鹵可耕步禱而甘澍如傾鑄大魁於首石冀文運之彌亨樹卓楔於

十洋期叶讖之禎祥乃祝聖殿之鼎建尤忠愛之所彰彭哲與者練

達鎮重心質於仁粵當甲午之歲適值饑饉之辰穀價騰踊與金珠

共珍每百觔七錢零道饘如麻觸目愴神不逞効尤而剽掠三尺弁髦而弗

遵侯例慄以平糶攜糧而遍均歷窮鄉與僻谷布霜雪之陽春僅置

罟於大憝大開網於疲民鄉約之行尤本忱恂賢祠義倉輪奐鼎新

惠不止於民艱恩尤覃於士類合而言之鍾有剛中之柔彭稱仁者

之勇皆不愧乎循良宜均荷乎殊寵鍾乃以調簡而行彭乃以量移而去業尚竣究竟豈忠勤兮未償河九曲而通海鵬暫息而高翔郁文周者存心兢業敷政慈祥始下車而葺正祠捐已資二十處贖銀四十搆文公祠躬步禱以活稿秧力疾乳哺單赤課士鑑別驅黃禔躬若雪執法如霜凡署中之所需半取給於家囊殲放火之劇盜賑阻饑之羸羸乃以勤勞致瘁未終其政猶幸馬氏之多良也盧龍雲者性執詞寡妙染工詩歷官久初合馬平繼合邯鄲復任臨胸而輕車熟路行吾志而操刃委蛇崇賢亦修五立教建倉建東平西平二倉乃以清勤致謫尚看卞玉之竟知也其佐史則趙允張文米襄明承陳之邵趙文孫宋簿劉有源明簿陳維德宋尉黃本熊廷用明尉倭至保城民全其生水溢築堤民享其利功烈可紀者難以更僕此其大者均以卑秩而樹

長樂縣志

卷十九下

藝文錄

三

賦

德誠於仕籍乎為難彼趙文孫之稱宋室孤忠閩南碩儒尤其砥柱狂瀾者也其官師則孫大雅廖正潘援劉洙潤郭岱陳文燦明論余珙胡大韶郭翰明訓均陶融乎士類咸不媿於師模而劉洙潤之講學正已識士塵埃尤某之最荷其勤渠也者其合祀於名宦祠則李葺閔希聲吳仲舉蕭竝徐世英袁正規吳一鳴呂復邱宗亮王遵道潘府龍韜何應和吳遵詹萊蔣以忠郁文周張文可朱襄陳之邵劉有源黃本熊廷用孫大雅廖正余珙陳文燦生有功德祀而迎之登彼堂兮蓋不覺見公於羹也其別祠於夔相之圃則韓紹陳奇謀鍾萬祿彭哲與畏壘思深祠以祝之瞻彼鴻兮復何時遵余之陸也夫道洽政治民所以澤汝墳化行地所由稱故範圍曲成之政達遂山川文

物之勝增賦吳航而及賢令與明師者見吾邑之名所由興也若乃
天喬由條魁瑰蕃庶梗柎杞梓之成林荔圓棗梨之麗土禾黍苧蔴
之植近郊織鱗蓮草之濯池浦產雷同於古槐名不必於再數爾其
孳尾希革毛毳毼毛其形拉蹶其生孔多閒雖飛於郭內實則巢於
崇阿鱖鮓蜃蛤兩鮓乘鱉會尉一羅種類輻湊雖入市於日中實從
鮫人而得購非所出而不談懼吾言之刺謬乃其風俗則戶詩書而
人咕暉家孝弟而農刈鉦官稅竭蹙以輸贍生耨舌耕筆有無相通
患難相恤婚姻死喪鄰保共爲拮据歲時伏臘徵召殷勤歡暱兢兢
六諭無敢放逸容隱罪愆包荒過失閒有辭訟之子多遵教化而歸
甯一彬彬乎鄒魯之邦雍雍乎禮義之質昔通德門爲鄭元而稱君

長樂縣志

卷十九下

藝文錄

三

賦

子鄉爲王烈而述若長樂之淳風實嘉名之堪匹惟不類之慚余靡
片長之足述顧占籍乎大方愧王謝之芳軼勉好修於餘年期不踰
乎穀律客曰昔人賦西京則盡長安之地賦東京則極洛中之疆英
辭蔓衍鴻藻輝煌奇雖遠而畢述勝縱僻而悉詳吳航雖小哉猶有
都鄙廿四南北二鄉有干霄之京峙有極地之波洋何足下乃跼蹐
於邑屋之中束縛於附郭之場主人曰否否子獨不見聽鈞天之奏
者乎鏗鏘鏘縹緲足以充寥廓然歸而擊土鼓亦有真樂也又不見食
前方丈者乎金炊玉饌足以耀富貴然退而嚼黍粟亦有真味也緬
彼二京國華綺句擲地則作金聲濡毫則翔煙霧而不佞兮何人敢
邯鄲之能步第彼所尚者雕組也博而不必其實不佞所主者稽覈

也實而不務於飾博則馳心於廣肆實則宜搜乎至極一人也而必
詳其顛末一事也而必條其因由一山也而列名其峯岫一水也而
遙析其支流不披圖而可指卽一誦而在眸故第及乎邑裏不暇遍
乎遐陬尚有志於他咏冀境內而盡收若以比於昔人之典則良抱
愧而懷羞於是客曰乃今而後知班張之賦期於諷諫不靡麗無以
飫耳足下之賦期於傳信非歛華則至溢美班張之辭譬紅紫春花
豔冶奪目足下之辭譬蒼翠松篁天然文理是誠小人也謬騰說而
輕訾匪足下之聲歎幾矇矓以沒齒倘善言而尚再敬傾耳而長跼

梅花山水賦

王自聞

閩海之濱吳航以北石隴平原碁山別麓阜邱崎嶺而岩嶙陳塘廬

長樂縣志

卷十九下

藝文錄

齒

賦

港而濺涌沼渣泐滲而盤紆文石槎牙而峯嶺盱籌巖之寵窳眺浪
臺之礮錯摘上林之春花納下庄之秋穀九龍蜿蹲五虎馴伏琅琦
蔚然朝赧壺江瑩爾夜月石鼓喧闐金雞呶喔與砥中流沱分鼎足
南墅南洑之交流上塘下塘之遙矚金斗淘沙而鵝黃石牛沉齋而
鴨綠橫撫磁江直瞻御國泛則淼茫外洋泊則泚泚內濮潮至則厓
隙潰灑汐迴則天泉汨涸澆寶坑而挹斗壺繫繫崎而留丹壑前疑
之琴高神棲後草之真人尸祝至於三門水郭百雉金城寶明太祖
之勅設而江夏侯之經營陟巘恍升堦之城級疊疊猶掛壁之燈檠
轅門所洩聖塞是屏元武挺其傑閣寶光聳其華楹臨水玉麟衍瑞
湄洲鐵馬效靈武安需於振耀文昌揭於中興樂廩儲教倉餘粟麗

譙銷蜃島氛侵列十二臺隍於澤路比什伍簡教於閱亭協戍師于
鞬弓搆矢待潮樓櫓鳴角披旌木舶通天朝之歲事衮衣馳中山之
王庭春秋兩汎尤宜冰兢先時則運沙蒔草分更則擊獻提鈴龍峯
日旭鬼谷雲蒸東調羹鼎南展鵬程侍中豔麗登降崢嶸四境之內
既庶且甯有明農而疆以有學圃而砥泮有屠酤而什一有粢麩而
奇贏有茅纜舨艫而鬻販有石杠罍罍而鮮腥細而揭緝扞箱手麗
百袋大而石槌豎縑罟網圍溷海爲業壹是治生兼之家耽文物
之勝戶播絃誦之聲楚楚冠蓋彬彬青衿厥木惟喬梅花是名首丹
桂玉蘭而馥郁羣蒼榕翠竹而葱菁儻顧名而思義其合人物而向
榮也耶時夫和風鼓暢也山紅與江蘼共芳鴈鵠齊鷓雉並疇爰居

長樂縣志

卷十九下

藝文錄

奎

賦

依渚而棲遲春鉏隨波而下上遊人踏莎而行歌舟子鳴榔而盪漾
融融景明神怡心曠斐爾颶風震蕩也鶴鴿潛形鳧鷖遁掌捲走石
之飛沙撼排空之濁浪擊大磯而輞軋砭瀾漲後塢而淚漫漉沆行
客吹帽而束衣漁父罷綸而歸舫霽哉風色令人悲壯若夫水陸之
產孔有孔嘉斷葱翦韭拔薤食瓜雖東西之各本均青門之足誇玉
質滋土膏以盤結黃精衍胡種以繁華垂玉筋剖青錢中原采而彌
夥紉葫蘆懸春杵樛木纍而尤麥川芎園葵花椒山柰絳薯白芋紫
薑彤茄蕙苾含珠於原野芭蕉分綠於窗紗野核則黏乳刺珠荆棘
狗萸桃粉鹹瑚萼萼酒管藥材則山藥金櫻南星香附葛根商陸薄
荷山查蔬茹而菴苻倭蓂赤根青芥杓匙苦蕒蔓菁蓋藍則資生於

馬稠北寮塘勝負郭菓實而桃李梨柿楊梅枇杷龍眼荔枝香柑橄欖則取給於金墩洋裡肩負力家岑巔有紫菜磴上有石花苔枸地藪鋪於荒壟椹菰木耳茁於枯槎它如釣繩鹿角鷺腸雞胶無脛而至輻輳交加载有蟀綠藏瑤柱立距石頭收墨賊花卮而蝶蛸青鎖而管鏞蠟則沉淵窟以成房蠖則附瀾灘以着粒覆帽裂裳而垂涎傍眼珠胎而碧血時見淡菜丁香亦聞覆罩龜腳螺有頭馨黃亦尾滑或花在背或米在穴或薄膚而銜泥或寄生於別室烏者爲蜃白者爲蛤浮斑斕而車沉璀璨而澁螂蛄而深窩蛤蜊而徧狹居瓦墘而縷冰鈿函花封而表黃甲利漁人以夜光喜施妹之緘舌彼數公子擁劍無腸兩螯斫雪滿殼含黃醃則入何稍糟確鮮則佐畢卓酒

長樂縣志

卷十九下

藝文錄

癸

賦

觴花而衝鋒末銳紅而撥棹高揚是皆蝸蚌郭索之族實維元冬金甲最良噉鑪駁而矯其虎數金錢而毛其芒莎馬螃蜞並醢蘆禽鴛步斯張其名曰蝦蒲籃搏取玻瓈白胭脂紫黃朗殊稱盧箕並侶嘆目躍於沙泥巨擘溺於洲渚大者合歡小者浸滷曾聞瓊珠已獻於陶唐誰謂長鬚亦信於刺史水母借以輔行懶婦猶然多子更羨蝓實芬香之醬鮓爲純潔之鈎蝦枯鶴頂水蠖龍頭投泥而跳匿窖而鰍田蝨與石鱗相爲攪擾土筍與金扁各適沉浮俱侑雞豚鷺鴨不時燕會綢繆爰有嘉魚洵美且都寄素書之鯉和齋膾之鱸銀梭尖啄而魴鰻尺平唇而鯁鯧則鱗文綻錦鱗則星點聯珠清潤者鰕肥甘者鱸松有青黃而色可辨竹與銀抹而義自居黃梅於黃瓜不類

白帶於浮帶亦殊鱠有異形其大者爲鮑爲牛爲水探爲砒并而小
爲黃爲花爲鼻爲鷺爲織脇可析而銀縷鯊有多種其大者爲青爲
糊爲帽爲桐爲烏翼爲長簷爲犂頭爲螭鯉爲龍鳳爲猫頭而小爲
雙髻爲尖尾翅皆濩而金絲白力黃山掩豆而足土甲春子每食無
餘鞋底比趨瓠其口鐵其膚稱小子號大姑準身似蛇味旨狀頭臨
凍膏腴青鰻風之作脯塗龍炮之爲酥土鱠金鱠體幹稍敵黃蠟斗
底肉骨相符曰馬曰虎曰豚曰豬編車重難釣石海鰕大越舳艫刺
鮪畫臍祇充貽聘蛾松赤蠅詎入膳資毋論鮪鮓鯪鯨之雜選鯉鱸
鯢鯢之參差卽白雀青鱗以及鼈鼓豆青螻蝓與小娘龍女而至車
錢海蠔沙梭皆鱸羣醜難以悉數矣迨夫春暮其至以時彤鬢碌口

長樂縣志

卷十九下

藝文錄

七

賦

脂尾豐頤鱗比次而熠燿皮潤澤而凝脂豈多骨之足恨惟烹飪之
適宜蓋風物信美亦山海稱奇也歟哉亂曰有異人兮探奇蹟望蓬
萊兮叩石室指扶桑兮啾啾鳳鳴跨溟渤兮矻矻鼈極燃犀兮水怪
愁書草兮山妖泣馮夷屏息兮江妃娉娉靈胥懷柔兮陽侯辟易採
神芝於峭壁兮掇異草於懸崖渺六合於一杯兮等滄桑於嘯吸願
言海波不揚兮越裳重譯光嶽凝醇兮文明洞闢斂鯢化以挾秋濤
兮聳春桃以鼓鬣騎箕尾而霈甘露兮利濟川之舟楫

梅花雪洞賦

前人

余夏日書倦據梧而瞑夢遊一大宇闔戶履庭扱城入室有榜其額
曰雪洞閒白駒絕隙遊蒙輕盈清涼幽敞虛白晶晶瑩光蒸日皓色

凝神以爲雪邪火鳥燄熾雪奚宜至謂非雪邪珪輝玉粹可意懾氣
少進而前見一道人脩脩然巾華陽之巾衣鶴氅之衣正襟默坐顧
余而嬉余揖而請曰未雲何雪不山何洞曰雪曰洞曷取而云道人
曰非雪之雪其爲雪也溫融不洞之洞其爲洞也深通此上帝所以
與我會眾理之宅宰萬物之君故精一湛寂毋染塵氛非子之清真
韻宇飄然不羣未能采斯門而窺此乾坤肆茲雪洞維予之宮雪洞
之趣維子之同曷不謝世慮之紛綸恆與我而相從洞空中之局鑰
玩八荒之鴻濛樂爽塏以漫衍寄太宇而長終余遽然而寤亦未卜
其占之何居也越伏日苦暑徙其讀書處於梅倉之別所適見地位
微涼牕壁清穆神遊覲遇宛然在目是夕之寢假寐閒忽見昨之道
長樂縣志

卷十九下

藝文錄

矣

賦

人顧余曰疇昔之入室而揖予者非子也耶余所謂維子同者非茲
所也耶子今於茲也不徒怡形神杜塵緒且寥廓大觀鑪錘渣滓植
節義於歲寒漫遊於氣母推濯磨之靈光俾共刮乎舊汚無閔元同
曠然物與則程門雪白鹿洞不必問在何處也余俄而覺遂以雪洞
名茲所因起吹藜索筆而賦

吳航書院賦

陳昌蚤

天開繡壤地萃人文育英孕秀揆藻揚芬稽北拱星躔野分牛女紹
南來道範心契邱墳新甯之古風懋穆吳航之佳氣氤氳宵雅肄三
欣檢瑤函寶篋大昕鼓再歡聆泮壁鼉鼓匪問難析疑詎得豁然有
會惟樂羣敬業乃能廣所未聞於是江右儒宗南州先覺殫經營周

計較闢講堂廣學校座踞六屏之麓取象震離室毗三聖之傍追蹤
忠孝浦流文洽頓生馬水波瀾櫓下雙江淘盡龍津泥直轟轟乎複
檻迴旋隆隆乎重檐籠罩光祀諸賢敬敷五教振木鐸而廣甄陶懸
金鑑而程則倣首石劣崩瑞鍾藻榜之魁鼇嶺嵯峩采蔚騷壇之豹
境宏敞而且邃幽地截棄而非磽礪廣積曹倉列開西窖懿夫簡延
名宿培植梗枿教思遍布化澤旁覃友教四方大啓馬融絳帳從師
千里遠來李固書僭薪傳原於宣聖闡理本乎晦庵弦歌鏘金石之
聲如聞韶奏講論抒縱橫之議若聽塵談天根頻躡月窟恆探奇搜
孔壁葩采周南洞凜一王筆削周稽三禮淵涵百家廿史鴻寶秘函
業孜孜以鏗鑽良術有四心兢兢而乾惕大節惟三爾其繕性極之

長樂縣志

卷十九下

藝文錄

堯

賦

學表德充之符孔思周情各砥礪於行業陶分禹寸競敦黽於德隅
拓開萬古心胷光風霽月超越一堂智勇沂水舞雩槐蔭着風搖黃
晃千章縹軸柳陰經雨潤綠凝多士袍襦望月樓前卓午書聲傾耳
陽春橋畔通宵燈影橫衢課督宛同白鹿精勤甯減鵝湖扶大雅之
輪無方弗屈培斯文之脈隨處皆敷乃若手握玉衡屺程繅綵理尚
清純詞洞真宰刊落塵氛剔爬蓓蕾遵先民之懿規汰俗豔之凡猥
冲恬淵博賈茂董醇灑瀚汪洋韓潮蘇海田是鼎新革故返樸還淳
誠意正心幾踵考亭之武型仁講讓甯殊泗水之濱廿四都圖樂承
芳躅十三街巷敬羨德鄰仰宮牆兮巍峻企品地兮岫嶙合抱良材
允樹朝中楨幹連城華寶適成席上瑤珍蹒蹒濟濟侃侃閭閻麟麟

炳炳郁郁彬彬乃思芳徽之不振豈非陶鑄之有真也哉矧屆時調
玉燭祚重金甌樂正司徒育英才於黌序太常宗伯隆嘉禮於充鄒
桐翠高岡飛鳳翩翩萃蕃綠野鳴鹿呦呦思皇奮興於翰苑譽髦抗
志於 皇州繼往開來業由陶淑羽經翼傳功賴羅搜乃從而歌曰
邑中神君稱召杜 簡命煌煌守茲土既富且穀開藝圃花封百里
登春臺軒乎舞兮龔乎鼓倒篋翻笥招生徒人材鱗集霑化雨露化
雨兮進隆古風教裔皇兮媿隆東魯

長樂紀盛文

林瓊蕤

八閩首郡九邑亞都地接鼓旗星分牛女南北劃爲兩界東西別以
二隅曰原豐曰安昌曰新甯曰吳航千餘載之嘉名遞易爲善政爲

長樂縣志

卷十九下

藝文錄

七

賦

昌化爲二難爲芳桂廿四都之繡壤相連枕閩侯而帶玉融擬魯鄒
而稱文獻其在城壑金湯控百雉之雄亦有山川龍虎據一方之勝
譙櫓峻其瞻視關扃謹其衛防藏有軍國之需倉有積儲之富十三
巷底巷巷舊家聲十六橋頭橋橋新氣色開十洋之市坊暨街達還
沿浦之珠水通泮壁府署堂廡拓三台以爲基學社市塵闢五門而
式廓九溪環其外四明宅其中六鼇駕其前首石擁其後雙江倒峽
鎖水口之長虹孤塔凌霄擎雲間之巨棟初有上通小有北溟下匯
南溟鬱鬱芝岡屏何翠也悠悠馬渚澤之長歎跨金斗之岡金雞宛
如唱曉擊龍門之浪龍台允矣朝天陳塘趨東海以歸王籌岳峙西
涯而托月靈峯劣削上窟天池御國峻嶒俯臨松址崎江湧千層之

雪浪點綴梅花磁澳開萬頃之海門崢嶸龍角雲母磯連王母紫微
峯映翠微沈闖王之禁石於洪濤鮫人藉以作室結夫人之高髻於
絕頂娥女彷彿其新妝當陽觀前溪山第一龍泉寺外林壑無雙萃秀
氣於稜官雁峯點頭若觸標羽儀於王國鴻岫展翅如飛福水每戲
魁龍丹山時來威鳳沙京簇錦躡雲梯而摘仙桃壺井流瓊啓石門
以伐鼉鼓朱晦翁讀書處二劉開講易之堂伸蒙子德成巖片瓦蓋
精忠之魄臺名樂壽想仁知之性情巖日星躔知郎官之朗照獅盤
白石鼇起黃岑龍潭之瀑浩如牛壘之山卓爾沙布金坡之色大小
祉連渠飄玉沼之香東西湖廣鴈度鱗蝦岫畔鶴鳴寶玉溪陰五馬
彩雲橫七巖明月舉蓮峯孤挺豈少蓮仙桂石雙標雅多桂客江坑

長樂縣志

卷十九下

藝文錄

三

少

羅竹四田之阡陌交通石岵岱蕉三嶺之蠶叢更險斯固開六平之
佳氣厥百里之雄圖者也天子重邊陲簡良吏成城詹父名萊眾志攸
同致命呂公名復尺環自靖吳名遵陳名昭楊名麟鄭名友尚名一琴之化日何
舒李名葦閔名聲方名翥潘名府兩袖之清風自爽杜母悲思於峴石厥惟
龍名韜郁名周蕭名茲韓名紹召父留蔭於甘棠爰有伍名澤何名和應名王王名遵
道名皆蔣名本以忠上至若張名可朱名襄諸佐寄興哦松胡名訓大名韶廖名正
教論數師嗣音振鐸黃名典本邑熊名廷用劉名邑有源郭名教論孫名大雅
趙名邑文孫汪名主簿余名訓導善政猶存餘風未遠惟作人同於械樸
斯雅化蔚為菁莪理學則林慎思著續孟之書黃勉齋定喪祭之禮
季慈也元滂也如晦也自修也陳姓羣探正學之宗嘉譽也世南也

砥礪也子玠也劉氏共闡考亭之奧叔權張洽淵源親接於紫陽申之自誠正座同分於白鹿乃知樂邑不減武夷若彼先儒何殊濂洛名臣則林士仁也陳德隆也鱣堂雨潤馬帳風清既爲已而爲人亦不倦而不厭鄭錫文德被西粵若李廷謨謝肇淛陳大濩諸公孰無可飲之和謝廷瑞威震南瓊若陳經甫林承訓蔣恪箴數輩總無可犯之色陳祖斬蛇跡葉矣陳良謫戍遠遷矣而旣死民葬衣冠奮筆立裁冗秩者則陳仲進陳仲完有焉陳景隆養善卽讒矣陳文沛鋤強起弱矣乃招降而賊以附決策而倭以平者則林廷選石磐有焉抗勢家者林山林德也而陳維裕陳季周不與匹休乎恤民隱者陳讚陳談也而林宗顯謝廷柱甯庸多讓乎平寇拒金時則有若陳毓

長樂縣志

卷十九下

藝文錄

三

少

賢陳伯震築城護國時則有若林枏陳聯芳高廷忠卻餽而返金尚已其他張紳陳潭周行陳讓匪廉以律已卽婉以拒人謂非潔清之選歟林裕陽臥巢而服盜著已其他陳懋觀林恕鄭岳王有恬匪履險而能安卽居常而慮變謂非勇知之英歟葉時敏特疏養親趙以夫上書定儲鄭世威裕民減稅謝士元裹創帥兵黃文政雪三十六冤黃德藻賑數千萬戶陳日華遏絕淫祀陳公儲徹制詭隨觀察南京李丕顯賢聲大著乞休北闕王益祥壯志彌彰金納五千陳訐謨之收滫權檄飛三日陳應春之絕滇妖掩骼心勞林世章澤及枯骨運漕冰解謝漢甫誠格皇天大法小廉進思退補洵王家之楨幹聖世之瓊瑤也其在忠烈則寸舌可封孤忠難屈者林虔中也生除克

暴死出神兵者陳伯嘉也斬使以抗元從子克繩其武者陳文龍也
赴江而殉國家人共殞其生者楊夢斗也黃孔鑄之就義一笑而亡
也林公黼之抗言累杖而斃也殆所謂雖死之日猶生之年者耶其
在節概懷芳落落不親通顯之故人者其鄭憲乎廷杖奄奄尚殞無
歸之朋友者其鄭源渙乎發貴人之黃白拂袖而歸者其陳安乎痛
奄寺之擅權掛冠以去者其陳崇德乎此則難進而易退彼亦辭熱
以就涼云大抵庭獻必本家修作忠斷推克孝林巨卿之與鄒異廬
墓洒甘露之祥矣陳宗傅之及老成兄弟死元兵之戰矣范御則擊
登聞而救父矣陳昌晉則滅已算以延親矣夫庸行克敦雖愜幅自
饒藻采惟彝倫攸敘斯修辭益壽名山請由孝德之餘而數藝林之

長樂縣志

卷十九下

藝文錄

七

力

最卓雲之有求衣賦扣鐘詩也鄭洙之能駕曹王壓元白也陳有聲
之倡上高詞賦也郭陞之有春秋傳論也林通之有縣圖經也鄭定
之有澹齋集也陳亮之有陳搏傳也陳玉之有居幽歌也高淮之有
竹所吟也陳登之有石田稿也王恭之有白雲樵唱草澤狂歌鳳臺
清嘯也高棟之有玩宇文原唐詩品彙拾遺正聲也其流之光其積
之裕焉耳以選舉顯者開科以來對於廷者二百八十有二明經而
外舉於鄉者三百五十而餘自元及明六士鹿鳴首選延祐四年陳
三年林文壽洪武辛亥林谷顯洪武癸酉林賜浩至正二十
永樂丁酉李馬正統戊午林僑俱鄉科第一人由明遡宋七人臚唱
先聲紹熙壬戌陳誠之淳熙戊戌姚穎嘉定戊辰鄭自誠寶祐癸丑
姚勉咸淳戊辰陳文龍永樂辛卯馬鐸戊戌李騏俱廷試第一
人至於寄籍占鼈頭尚有可指林寔本學教諭之歸宗踞龍首亦未
子宣德庚戌

補遺

姚涑本縣合子隨父至任嘉靖癸未狀元一門三舉三

翰林江田獨鐘其盛七世二元十進士姚坑克世其家林昇陳德隆

培五桂而並秀陳鄭莊林戴慶九德以同坊天下大魁馬李二人相

望閩邦首唱賜僑兩世聯登父子俱尚書陳瑞載生長祚春秋連解

狀李馬改爲李騏彬彬乎王謝之家濟濟然簪纓之望以隱逸重者

劉世昭號慧觀翁鄭文霖號耽犁子林清號阜林梅隱林敏號瓢所

元冥陳奎甫寄遠志於藍橋陳漢臣辭南安之教諭林紹不拜丹詔

發清嚮於林泉歐陽伉兀坐青毡詳五經之旨要豈其煙霞痼疾曷

以軒冕泥塗以鄉行稱者李長孫一川興利鄭伯達六葉同居嚴光

田宅俱捐四里均沾其潤林鷗夫妻同捨二湖長清其膏林通則倡

長樂縣志

卷十九下

藝文錄

七

學輸金董巖則毀家贍族一鄉之善千古爲昭以技藝鳴者林良箴
琴書兼妙張士達龍虎如生鄭孔濟術擅岐黃數年前之死生早決
林景時獨工山水一潑墨而流峙宛然林宏顯開筆底之梅花彷彿
暗香浮動劉孟昇學廿年之篆籀分明蝌蚪縱橫所翁之龍點睛真
能致雨叔弼之鴈插翅便可入雲是皆繪水有聲繪火能熱雖爲小
道必有可觀也顧丈夫之不朽有三而女子之所從惟一石氏一吁
殞命林氏三躍身亡申屠氏殺方六之首以掃墳牲以人代林尾姐
葬董峯之巔以矚遠死望郎回彭氏懸像席前紙上呼卿如對飲董
氏拾巢爨下空中飛鵲若爲炊葉氏室幾焚木翻尅火翁氏刃旣頓
指有餘鋒前義姑後義姑星井玉溪互映石節婦林節婦發光嬖女

聯輝陳姓曾有一難姊妹居然伯仲吳門蹇遭兩寡妯娒恰似夷齊
伸大義於蛾眉勒芳名於蠹簡良可惜也詎不榮哉若乃吾與之徒
閒亦各行其意或利他而利自抑說位而說空董奉醫仙庭遊一虎
百丈大智鉢托雙龍題石石自開李頭陀獨參上乘之法驅雷雷卽
震陳靈通曾讀異人之書極之物產之蕃具見海疆之富松橫幽壑
竹遶平村荔枝以龍眼爲奴首推勝畫橄欖與青梅並苦偏覺回甘
蘭有獨占素心遠超衆蕙菊則紫袍金袖尤殿羣芳杜鵑枝上杜鵑
啼蝴蝶花閒蝴蝶舞金鶯百舌聲囀喬林翡翠輕鷗彩翻碧浪白頭
翁不分老少素衣女豈辨雌雄車蛤出沙中西施之舌半吐蠪房附
石上太真之乳何甜似此山海之珍緇黃之屬飄然遊方之外蠢然

長樂縣志

卷十九下

藝文錄

七

文

處物之間聊信筆而類書非名邦所倚重者矣蓋嘗綜而計之間閭
鱗次環水附山甲第雲屯騰蛟起鳳煙墩塘寨嚴四境之隄防邱墓
祠壇綿千年之樽俎田疇交錯江浦滌洄清淑之氣所凝賢哲之生
爲盛或立楊游之雪探月窟而躡天根或聞曾閔之風溫冬衾而清
夏枕或經略優一時之保障或韜鈴裕萬里之長城或疊產鳳毛絲
綸世掌或羣飛鴈序金玉連鑣或人在鏡中獨精藻鑑或吏行冰上
不受苞苴或授命則折檻之朱雲或仗節則牧羊之蘇武或効一官
而必敬或膺五聘以猶辭或瀟洒如米顛或豪俠如劇孟甚者姿含
冰玉操擬松筠五夜梭寒一丸和苦孰非此方之秀應運而興者乎
慨自海寇跳梁因之邊疆重徙兵禍洊至萬井無烟虎豹肆威千鄉

俱曠悵飄蓬之靡定思采菑以無依幸 聖主加惠編氓使羈人盡
歸故里鴈集安宅枌榆樂醉飽之天燕戀舊巢邱壑尋釣遊之地耕
田鑿井鼓腹歌衢服賈牽車沿途唱晚扶桑迎旭日蜃樓海市干端
越嶠起扶搖雲路鵬程萬里桑麻雞犬留滄古之風禮樂詩書潤太
平之色 瓊鞋 駑駘下乘檣櫟散材生長宗邦覽江山之重秀搜羅往
事快風物之日新憶射策於 皇都敢云友盡天下景前徽於梓里
竊願尚論古人謹拔夏志之尤謬嗣幼溪之賦此其大畧庶幾窺吾
邑之一斑假我數年當更誌 國朝之全盛

長樂縣志

卷十九下

藝文錄

美

文